

MAUNAU IAKE RERIHONI YESUSI WANI MARUKUSI IKANUI

Yohanesi Ia Mamsohue Iseka Tau Arena Osi Yesusi

1 Areini Maunau lake nene aikune. Maunau lake reini rerihoni Yesusi, Ia Anahatana Iratiki lunaso Okarihuru. Ia reimo, Anahatana anai. ²Maunau lake nene aikune sani masuae Malaki, ia mamruni Anahatana ne anamanaya isa, ikanui. Ikanu ata Anahatana iasau sani rei,

"Mka au uaisosi we maisosie ianaone, ano tau muie, na ia rei iaunauso sani iseka tau arena osia."

³Oyo Yesaya, ia mamruni Anahatana ne anamanaya, ikanu honu ata Anahatana iasau,

"Ia isa nioi iakapona pani oto huie sani rei,

'Sani sio oseka tau arena osi ia mainae, aunauso rerihoni au na sio oatinu tau Upuri sani sio ouna arena katopue mka ieu."

⁴Sani Yesaya ikanui sani rei, areimo sani Yohanesi ihokai pani oto huie. Ihoka isohu sio panesi runa iaunauso sani rei, "Aarihoni me rosau, oyo au usohua na Anahatana iuna heu me rosau." ⁵Sio pusiso sui tihue Yurea runa kota Yeruselemi ohoka oatinu tau Yohanesi ne maunauna. Sio oamanaku no rosau, oyo Yohanesi isohuso pani Wae Yorani.

⁶Yohanesi rei iausahu papite rerihoni unta nene unte. Inene koropou unte pani ahai. Iai kauka runa kilalan wesie. ⁷Iaunauso sani rei, "Mka ia isa ihokai tau muie. Ia reimo mka ne kawasa mainae erenesi au we kawasa. Au mo, au mainae tewa, reiso ukanahata, oyo unosu ne sanraliu rerihoni aini atua iae, iake tewa. ⁸Au usohumo tau tihu. Ne ia mo, mka irui Anahatana Ne Inaha osimo."



Anahatana Ne Inaha Isipui Sani Manu Samane

Yohanesi Isohu Yesusi

⁹Oyo Yesusi ihokai on poe niāne Nasareti poe tihue Kalilea, samatoro Yohanesi isohui ria Wae Yorani. ¹⁰Isohui oyo, Yesusi ihokai rerihoni waene rei, oyo inoo nante erehekai. Oyo Anahatana Ne Inaha isipui sani manu samane, samatoro inusui pani Yesusi. ¹¹Inusui oyo, sio oatinu nioke on roe noiyaha ereasau sani rei, "Ano anaku wani anoku runaya. Anoku iake tau ano."

¹²Mata hun tewa oyo, Anahatana Ne Inaha iuna Yesusi ieui ria oto huie. ¹³Tau onona hutu ate waini ria rei. Setani iakarotai na ipusui. Makapanau rasea waroni ria rei oi runa sio maisosia on roe noiyaha oakahaiki.

Yesusi Ianaha Runa Sio Mamhikua Ate

¹⁴Sio oaresi Yohanesi nea, oyo Yesusi ieui poe tihue Kalilea nanie iaunauso tau Maunau lake rerihoni Anahatana. ¹⁵Hoka poe oyo, iaunauso sani rei, "Mata hun tewa oyo, Anahatana iuna natu tau sio pusiso. Oarihoni mo rosau runa oparisaa tau Maunau lake rerihoni Anahatana."



Yesusi Isupu Sio Mamhikua Ua

¹⁶Yesusi waini ieui sui Nakane Kalilea nusue, oyo inoo sio mamhikua ua. Sio reimo wasoni Simoni runa wanini Anreasi. Sio wasoni ohiku onina ikae. ¹⁷Yesusi iasau osiso, "Oeu mai na opusu-pusu au. Mka au uatuhetemo na ohiku tumatau osiku." ¹⁸Oyo sio oarihoni no ueta, oyo oeu opusu Yesusi.

¹⁹Yesusi ieu hainau mkane, oyo inoo Yakopusi runa wanini Yohanesi, no ama Sepereusi. Uaso wasoni pani lepa-lepa anoe oseka tau no ueta. ²⁰Yesusi ianaha runaso san-sana. Reiso sio oarihoni no ama pani lepa-lepa anoe runa sio umau honu wasoni isenu osiso na onana tanei osiki. Oyo uaso oeu opusu Yesusi.

Yesusi Inei Sakahatene Rerihoni Tumata

²¹Yesusi sio oeu rotutu ohokaso mai niane Kapanau. Tau ranie hatae rei iaranahata oyo, Yesusi inusui pani numa mananouna osi sio Yahuriu, nanie iatuheteso. ²²Sio wasoni oatinui rei, osira iatuheteso sapani. Iatuheteso sani ia ne kawasa. Iatuheteso sani sio matuhete Musa ne maunauna tewa.

²³Oyo ia isa waini sakahatene eresuniki inusui pani numa mananouna rei, oyo iakapona ata, ²⁴"He, Yesusi, ano Nasareti. Ano nanie auna sae runama? Ano ahoka ahunuma? Au uanei nea. Ano mo, arui ruamu osi Anahatana. Ahokaya on roe Anahatana!"

²⁵Ne Yesusi isopoi sani rei, "Amaturua. Ahokaya rerihoni ia reini."

²⁶Reiso sakahatene rei ereunai ikananunu, oyo iasanoata samatoro erehokai rerihoni ia tumata rei. ²⁷Erehokai oyo, sio pusiso osira nai osa. Reiso oasei tau umau, "Ira, oel Sae reini? Matuhete honuel! Tau ne kawasa inei sakahatena, oyo rahoka rapusu ne maue."

²⁸Oyo sio pusiso sui tihue Kalilea oatinu rerihoni Yesusi san-sana.

Yesus Isuisene Sio Panesi

²⁹Yesusi runa Yakopi na Yohanesi tonuso ohoka oarihoni numa mananouna osi sio Yahuriu rei, oyo oeuso poe Simoni runa Anreasi no numa. ³⁰Simoni inai hanahanai inekei poe rei tau ipusai. Reiso sio osima runa ne kupue osi Yesusi. ³¹Reiso Yesusi ieu poe ia pina rei, oyo inana hanai atue, ihetui, oyo iakahaiki ihitioi. Oyo ia pina rei ne kupue iake rei sirinia. Ia iake nea, oyo ia pina rei iatanunu na ipanaso.

³²Nene mono, tau ranie eresohui nea, oyo sio panesi orori-rori sio kupua runa sio wasoni sakahatena rasuniso. ³³Reiso sio wasoni poe niane hahae rei, pusiso oamanouso haineke mitanunue. ³⁴Oyo Yesusi isuisene no kupua runa inei sakahatena. Ne isopo sio sakahatena rei na pene oanamana tau sio oanei ia mo, ia sia.

Yesusi Iaunauso Pani Tihue Kalilea

³⁵Hanroe, tau ranie eresaa tewasi oyo, Yesusi ihanui, oyo ieu iarihoni numa. Ieu roe oto huie nanie ianamana runa Anahatana. ³⁶Ne Simoni sio oeu oninai. ³⁷Osupui, oyo oasau sani rei, "Sio pusiso wasoni oninaya."

³⁸Ne Yesusi on poe iasau ata, "Mai, ieuta sui nia tamena sui tihue Kalilea reini. Au nanie uaunauso oi. Tau rei, au uhokaku mai."

³⁹Reiso Yesusi ieu ihori tihue Kalilea pusiki. Ieu iaunauso pani numa mananouna osi sio Yahuriu runa inei sakahatena.

Yesusi Isuisene Ia Muhune

⁴⁰Ia muhune isa ieu pani Yesusi, oyo irike tune mai Yesusi uai anoe, nanie irui muirani osiki. Oyo iainisi ata Yesusi iakahaiki. Iasau ata, "Kani ano nanie, amaha asuiseneku." ⁴¹Yesusi anoi runai reiso iakahuui tau hanai atue, iasau ata, "Iake. Usuisene nea." ⁴²Ranie hatae rei, oyo kupue rei rerihoniki. Kupue rei rerihoniki oyo, ia muhune rei iake. ⁴³Oyo Yesusi iaisosiki ieu, iasau ata, ⁴⁴"Anomu erepeka. Asupu sio umau, pene aruni-runi. Ne eua pani ia imam na aainisi na iarinii me unte ia-ia. Arui manua ua osiki na iakanupure osi Anahatana sani Musa iaunau. Tau rei, sio pusiso oanei ata ano iake nea."

⁴⁵Ne ipusu Yesusi ne maunauna tewa. Ieu suru ria, suru nau iruni-runi osi sio panesi ata, "Yesusi isuiseneku." Reiso iruni suru ria, suru nau rotutu Yesusi inusu niana iaahuniki mani. Iruei pani niane muie mani. Ne sio on ria, on nau ohoka-hokaso tanui sui osa sirinia.

Sio Oamanaru Yesusi Tau Iasau Ata Ne Kawasa Iuna Heu Rosau

2 Oyo nene onona ate nau sani rei, Yesusi inuniki pani niane Kapanau. Oyo sio panesi oruni-runi ata ia waipani numa nea. ²Reiso sio panesi ohoka oamanouso haineke numa rei rotutu sio umau mo, osupu naniau tewa nea. Pani mui haineke mitanunue iae, sio umau tewa nea. Sani rei oyo, Yesusi iaunauso tau maunauna rerihoni Anahatana. ³Oyo sio ate ohokaso orori ia talae isa, nanie ororiki mai

Yesusi. ⁴Ne sio panesi wasoni sinasi rei oneteso Reiso oeu mai tanui iake tewa. Reiso sio osaa roe numa hahae, oyo onosu ainataya waroni ranete numa rei, oyo oratiki tau ne kinoe mai Yesusi. ⁵Oratiki oyo, Yesusi inoo sio rei oparisaa ata imaha heu kupue rei. Ta sani rei oyo, Yesusi iasau tau ia talae rei ata, "He anaku, me rosau, au uuna heure nea."



Sio Onosu Ainataya

⁶Ne sio matuhete Musa ne maunauna umau wasoni oru-rue pani rei. Sio oatinu Yesusi ianamana sani rei, oyo oasei pani anoo ata, ⁷"Ia masike, iasau sani rei. Ia ianamana mo, sani ia Anahatana rei. Ia sia

imaha iuna heu rosau sani Anahatana? Anahatana ruai imaha iuna heure."

⁸Sani rei oyo, Yesusi on poe ianei ruai ata sio oasei pani anoo sani rei. Reiso iasau osiso ata, "Omi nanie oasei pani anomo sani rei, nanie ta hae? ⁹Wani sapani sahoro karahirine? Kani uasau, 'Me rosau, au uuna heure nea'? Te karahirine kani uasau ata, 'Ahanua, hetu me kinoe rei, oyo ruamu aeua?' ¹⁰Ne muie reini, au nanie omi oanei ata, mai tuniai reini, au, Tumata Reini Mo, Anahatana Ihitiku, we kawasa uuna heu rosau." Oyo Yesusi iasau osi ia talae rei ata, ¹¹"Au uasau osia, ahanua, ahetu me kinoe rei, oyo anunia."

¹²Ta sani rei oyo, sio pusiso onoo ia talae rei ihanui, ihetu ne kinoe rei, oyo ihoka iarihoni sio panesi rei. Ihokai oyo, sio osira. Reiso sio oainaa runa Anahatana ata, "Una nitae reini mo, ita inoo tewasi."

Sio Oamanaru Yesusi Tau Iaiki Runa Sio Kahatena

¹³Yesusi ihokai honu pani Nakane Kalilea nusue. Sio hutua ohoka-hoka mai tanui na iatu-atuheteso. ¹⁴Tau Yesusi waini inikui pani rei, inoo ia mamnana pea^a isa waini nanai Lewi, amai Anpeusi. Ia rei, waini iru-ruei pani numa mamnana pea. Yesusi iasau osiki, "Aeu mai, runa apusu-pusu au." Oyo Lewi ihitio roe, oyo ipusu Yesusi.

¹⁵Yesusi waini iaiki pani Lewi ne numa, oyo sio mamnana pea runa sio wasoni sio nusa niane oahata sio kahatena oaiso okata Yesusi runa ne mampusua. Sio panesi wasoni opusui. ¹⁶Sio matuhete Musa ne maunauna rerihoni sio ona akama Yahuri onoo Yesusi iaiki ikata sio mamnana pea runa sio wasoni sio nusa niane oahata sio kahatena. Reiso sio oasei tau Yesusi ne mampusua, "Omi mo matuhetene rei nanie iai ikata sio mamnana pea runa sio kahatena, nanie ta hae?"

¹⁷Yesusi iatinu tau maseite rei, oyo iasau, "Sani ia mamsuisene isuisene sio iaka tewa, ne isuisene sio kupua, au oi uhokaku tewa

^a Sio mamnana pea oakahai sio Romau oamanou pea rerihoni sio Yahuriu. Sio Romau otapiso oakapena na onana kepeni umau osi sio ruao. Reiso sio Yahuriu openeso tanuso. Sio oahata sio kahatena nai osa sani sio kimanakana.

uanaha runa sio wasoni oahata sio ruao, sio manisata, ne au uhokaku uanaha runa sio kahatena."

Sio Oamanaru Yesusi Tau Ne Mampusua Oamaoni Tewa

¹⁸Nai osa Yohanesi ne mampusua runa sio onata rerihoni akama Yahuri wasoni oamaoni. Oyo sio umau ohokaso mai Yesusi, nanie oasei tanui, "Yohanesi ne mampusua runa sio onata rerihoni akama Yahuri no mampusua oamaoni. Ne ano me mampusua oamaoni tewa. Sio oamaoni tewa tau sae?"

¹⁹Yesusi on poe iasau ata, "Tau sio oausahaso, sio wasoni opusu maisene rei oamaoni te tewa? Munata ia hehuke waini ikata sio asi, sio oaiso sirinia. Oamaoni iake tewa. ²⁰Ne mka sio umau osota ia hehuke rei, oyo mato maisene rei oamaoni iake.

²¹Sio oaturui papite monae wani wakihai tau nipa sin honue iake tewa. Mka sio osohu papite rei, erenuniki, oyo nipa sinte rei wakihai mainae honu. ²²Sio oaiinu tua honue pani une-une unte monae tewa. Mka tua honue ereuna unte rei wakihai. Ereuna sai-sai tuae runa unte uare. Tua honue, kahurae sio oaiinui pani une-une unte honue oi."

Yesusi iatuheteso sani rei na sio oanei ata maunau honue, sio onehui runa monne iake tewa.



Sio Oaiinu Tuae Pani Une-une Unte

Sio Oamanaru Yesusi Oahata Ipusu Ranie Hatae Rei Iaranahata Tewa

²³Tau ranie hatae isa rei iaranahata, Yesusi waini ieu inikui pusu nisi isa. Tau nisi rei, sio orahu manei (nooi sani ana). Yesusi ne mampusua oeu ohuku manei rei nene huaya, nanie oaire. ²⁴Reiso sio onata rerihoni akama Yahuri oasei tau Yesusi, "Masi anoo. Ano me mampusua opusu Musa ne maunauna tewa ohuku manei rei tau ranie hatae rei iaranahata, nanie ta hae?"

²⁵⁻²⁶Yesusi on poe iasei, "Omi onoo tau Anahatana ne anamanaya tewa, sapani na Raure inana poroti wani sio oruiki osi Anahatana? Poroti rei, hasae sio imam otapiso oaiki pusu Musa ne maunauna. Aikee inanai. Inanai tau Apiatari waini ia imam onate. Raure runa sio wasoni okatai rei omakaneaso. Reiso Raure inusui pani Anahatana ne numa, oyo iai poroti rei. Isamai osi sio wasoni okatai rei. Ne ia isa iamanarui tewa. ²⁷Reiso ranie hatae rei iaranahata, Anahatana ihetei osi tumatau, ihaye tumatau tewa na sio opusu maunauna rerihoni ranie hatae rei iaranahata mani. ²⁸Reiso Au, Tumata Reini Mo, Anahatana Ihitiku, we kawasa uasau sio otapiso ouna sae tau ranie hatae rei iaranahata."

3 Oyo Yesusi inuniki pani numa mananouna osi sio Yahuriu honu, oyo isupu ia hanaie isa. Ia reimo, ia hanai atue erematai. ²Sio umau pani rei oaka-akaohu Yesusi, nanie oamanarui. Nanie onoo ata kani isuisene ia rei tau ranie hatae rei iaranahata te tewa. ³Oyo Yesusi iasau osi ia kupue rei ata, "Aeu mai, runa aooa kua tihue." ⁴Oyo Yesusi iasei tau sio panesi rei. "Nene iake tau ranie hatae rei iaranahata wani



Manei Huaya

sapani? luna iake te? luna kahatene te? luna karihuru te? luna imatai te?"

Ne sio oamaturuso mani. ⁵Oyo ino-nooso. Anoi eresaa runa anoi runai tau sio unuo onata. Oyo lasau osi ia kupue rei ata, "Aasasona hanamu." Oyo lasasona hanai. Hanai iake nea. ⁶Oyo sio onata rerihoni akama Yahuri ohoka oarihoni numa mananoue rei, oyo orura runa sio mampusu Herore, nanie ohunu Yesusi.

Sio Hutue Oahata Yesusi iake Reiso Opusui

⁷Reiso Yesusi runa ne mampusua oeu oarihoni sio hutue rei, oyo oeuso pani nakane. Ne sio Kalileau panesi opusui oi, runa sio on pani Yurea tihue, ⁸sio on pani kota Yerusalemi, sio on pani tihue Irumea, runa sio on ria wae Yoreni ria hae, runa sio on nau niane Tirusi runa niane Sironi. Sio pusiso ohokaso pani Yesusi tau sio oatinu rerihoni ia iuna sae. ⁹Reiso Yesusi iaisosi ne mampusua onesa lepa-lepa oaunutui haineke ia. Iainisi lepa-lepa na pene sio hutue on sinasi rei mka oesei. ¹⁰Ia isuisene sio panesi, reiso sio kupua pusiso oruru umau, nanie oeuso haineke Yesusi, oyo oakahuui. ¹¹Pannuhu sio sakahatena onoo Yesusi sio caneia ata ihokai rerihoni Anahatana. Reiso oakapona ata, "Ano sahoru Anahatana Anai." ¹²Ne Yesusi isopo sio sakahatena na pene osima rerihoni ia mo, ia sia.

Yesusi Ihiti Sio Maisosia Hutusa Rahana Ua

¹³Reiso Yesusi inoai roe pupue, oyo ianaha runa sio umau wasoni ia ne maue sio opusui. Sio ohokaso roe, ¹⁴oyo ihiti sio hutusa rahana ua. Iahata, "Au uhitimo na omi okata-kata au na uaisosimo oaunau tau Maunau lake rerihoni Anahatana ¹⁵runa Anahatana irui kawasa osimo na onei sakahatena."

¹⁶Sio hutusa rahana ua reini sahoru Yesusi ihitiso, nanao: Simoni (ia rei, Yesusi ihete nanai tau Petu),

¹⁷Yakopusi runa wanini Yohanesi (sio rei, noa ama tau Sepereusi, Yesusi ioiso tau Poanerekesi, nene manariti 'sio sani tinaa'),

¹⁸Anreasi,

Pilipusi,

Parotolomesi,

Matiusi,

Tomasi,

Yakopusi (amai tau Anpeusi),

Tareusi,

Simoni ia Selote,

¹⁹runa Yurasi Isakariote (ia sahoru mka irui Yesusi osi sio ohunui).

Sio Matuhete Musa Ne Maunauna Oamanaru Yesusi

²⁰Oyo Yesusi inuniki mai numa. Ne sio hutue ohoka oamanousu honu rotutu Yesusi runa ne mampusua oai mosa tewa. ²¹Ia ne mansiau oatinu tau rei, oyo oeu osotai tau sio panesi oasau ata, "Ia Iarirunei nea." Sio oasau sani rei tau iai tewa.

²²Sio matuhete Musa ne maunauna ohokaso on roe kota Yerusalemi oasau ata, "Pesapuli eresuniki." (Pesapuli, ia rei Setani.) "Ia aia sakahatene rei irui kawasa osiki nainei sakahatena."

²³Oyo Yesusi ioi sio hutue rei, oyo iaunauso tau mamruni matuhetena. Iasau sani rei, "Sapani na sakahatene ereinei sakahatene ruae honu? ²⁴Munata sio niane owena-wenaso, niane rei huie nea. ²⁵Munata ipane isa erewena-wenai, ipane rei tihoniki nea. ²⁶Erehanake, sinana ia aia sakahatene inei ruai ne mansiau, oyo owena-wenaso, oyo ne kawasa mainae tewa nea.

²⁷Ia isa pisa inusui pani ia waini iamkona isa ne numa runa ikimanaka ne apia tewa on ikanihooi tewasi. Ikanihooi, samatoro inusui, nanie ikimanaka ne apia. Yesusi ianamana runa ruai sani ia pisa ikanihoo. Ikanihoo, areimo sani inana ia aia sakahatene ne kawasa.

²⁸Au uasau manisate, Anahatana iuna heu rosa sae mani runa iuna heu sio no anamana kahatena rerihoni Anahatana pusire. ²⁹Ne munata sio oanamana kahatene rerihoni Anahatana Ne Inaha, Anahatana iuna heu no rosa rei tewa rotutu ria supani." ³⁰Iasau sani rei tau sio oasau ata, "Sakahatene eresuniki."

Yesusi Inai Runa Nea Waniu

³¹Oyo Yesusi inai runa nea waniu ohokaso. Sio oaisosi ia isa ioi Yesusi na ihokai, oyo onapa pani mui. ³²Sio hutue wasoni oru-rue ohori Yesusi. Sio oasau osiki, "Masi anoo, inamu runa mea waniu wasoni pani mui oninaya."

³³Yesusi on poe iasau sani rei, "Inaku, ia sia? Wea waniu seiso?" ³⁴Oyo ino-noo sio wasoni oru-rue ohoriki, oyo iasau, "Sio reini mo, inaku runa wea waniu. ³⁵Ia sia mani ipusu Anahatana ne maue, ia rei, anoku runai sani waniku, hotaku, runa inaku."

Mamruni Matuhetene Rerihoni Ia Mamrahue

4 Yesusi iatuheteso honu mai Nakane Kalilea nusue. Sio hutue oamanouso ohoriki. Sio hutue rei opatapariki reiso iruei pani lepa-lepa anoe nau nakane hahae. Sio hutue rei wasonau nakane nusue. ²Oyo Yesusi iatu-atuheteso tau mamruni matuhetena. Iatuheteso sani rei, ³Oatinu. Ia mamrahue ieu iahurara manei kania. (Manei, nooi sani ana.) ⁴Tau ia waini iahurara manei kania rai, umau ramnahuso poe arena. Oyo manua rahoka raruture rotutu pusire. ⁵Manei kania umau oi ramnahuso poe hatu kania, tuamane mkane mani. Manei kania rai raruhu rapu tau tuamane kamanite. ⁶Oyo tau ranie katopu, tuhua rai ramnunu rakaimeniso, oyo ramataso tau namta rakaisunu hainau tewa tau tuamane rei kamanite. ⁷Manei kania umau ramnahuso poe mono uni-unia. Oyo mone uni-unia raruhu, samatoro rahehe tuhua rai na huaya tewa. ⁸Manei kania umau honu ramnahu poe tuamane wani iake. Manei kania rai tuhua, oyo raruhuso, samatoro

huaya. Tau umau osupu huaya hutu tonu, tau umau hutu nome, tau umau honu osupu utuni."

⁹Oyo Yesusi iasau, "Omi tinamo ukuna mo, oatinu ia-ia na oanei."



Ia Mamrahue Iahurara Manei Kania

¹⁰Yesusi ruai, oyo sio hutusa rahana ua runa sio umau honu oasei tau ia rerihoni mamruni matuhetene rei. ¹¹Reiso Yesusi iasau osiso, "Naone Anahatana iasau tewa sapani na iuna natu mai tuniai reini. Ne muie reini mo. au wani uatuhetemo sapani na Anahatana iuna natu mai

tuniai reini. Ne sio wasoni au we mampusua tewa, au uatuheteso tau mamruni matuhetena mani ¹²na

'Munata sio onoo na oatinu,

mka sio anoo rauni rapusu Anahatana

na Anahatana iuna heu no rosau."

¹³Oyo Yesusi iasau osiso, "Munata omi oanei mamruni matuhetene rei tewa, sapani na omi oanei mamruni matuhete tamena? ¹⁴Ia mamrahue sani ia iaunau tau Anahatana ne anamanaya. ¹⁵Manei kania waroni ramnahu poe arena sani sio oatinu Anahatana ne anamanaya ne sio oaneire tewa. Setani ihokai, oyo inana sae wani ia mamrahue irahu pani anoo. ¹⁶Manei kania waroni ramnahu poe hatu kania rai, sani sio oatinu Anahatana ne anamanaya, oyo oararumare sio anoo iaka. ¹⁷Ne anamanaya rai nene namta pani anoo tewa, reiso sio oapamese potuina tewa. Sio osupu susa te sio umau ouna sio okahikahiso tau sio oparisaa na anamanaya rai, oyo oarihonire san-sana. ¹⁸Manei kania waroni ramnahu poe mono uni-unia rai, sani sio oatinu anamanaya rai, ¹⁹ne anoo rauponu runa tuniai reini. Sio nanie onina kepeni runa apia panesi mani, reiso Anahatana ne anamanaya rahehe pani anoo. Reiso sio sani atuhu huaya tewa. ²⁰Manei kania waroni ramnahu poe tuamane wani iake rei, sani sio oatinu anamanaya rai, oyo oararumare. Sio sani atuhu huaya panesi. U mau supu huaya hutu tonu, umau hutu nome, umau utuni."

Mamruni Matuhetene Rerihoni Sio Oatinu Maunau Iake

²¹Oyo Yesusi iasei, "Kani sio orori kamane, sio onetei poe paruteni te? Onetei poe nuhanoe te? Oaunutui roe kamane aie na eresita sui numa anoe te? ²²Sae wani erehuniki, mka erehokai mai manahane. ²³Omi tinamo ukuna oatinu. ²⁴Oarinii sae waroni omi oatinu. Sae wani omi oruiki osi sio umau, mka omi osupu sani rei - runa omi osupu erenesi sae wani omi oruiki. ²⁵Ia ianei mkane mka ianei panesi, ne ia ipenei ianei, mka anoi kanihue sae waroni ianeire nea."

Mamruni Matuhetene Rerihoni Manei Kania Raruhuso

²⁶Oyo Yesusi iasau ata, "Anahatana iuna nату mai tuniai reini ne ita ianei tewa sapani. Areini sani ia mamrahue iahurara manei kania (manei, nooi sani ana) poe tuamane. ²⁷Tau mono inekei, tau ranie ihanui. Ne tau ia waini inekei ihanui, manei kania rai raruhu-ruhu rotutu roe mainaya. Ne ia mamrahue ianei tewa manei kania raruhu sapani. ²⁸Tuamane ruae ereuna manei kania raruhu, mata anoe tuhua, oyo noena, samatoro huaya. ²⁹Kani huaya mtuaya nea, oyo ia mamrahue ikupare tau musum tinou erehokai nea."

Mamruni Matuhetene Rerihoni Anahatana Iuna Nату Mai Tuniai Reini

³⁰Yesusi iasei honu, "Anahatana iuna nату mai tuniai reini sani sae? Au nanie uruni mamruni matuhetene na omi oanei Anahatana iuna nату mai tuniai reini sapani. ³¹Areimo sani kanapua kani msinae. Kanie rei, kanie iki-kine sio orahui poe tuamane. Mata anoe sio panesi opusu Anahatana tewasi. ³²Ne munata kanapua kanie rei ereruhui, ereruhui roe mainae nai osa. Nene sanaya rakarihuruso, rotutu manua roe ai atu rahoka rauna nene hutu rapusu sana nohua."

³³Yesusi iaunau tau mamruni matuhetena panesi sani rei, rotutu sio oanei tewa nea. ³⁴Yesusi iaunau sio panesi runa mamruni matuhetena mani. Ne tau ia waini ruai ikata ne mampusua ruao, iatuheteso tau mamruni matuhetena nene manariti.

Yesusi Iuna Ihu Malnae Rematurul

³⁵Tau ranie manne rei, oyo Yesusi iasau tau ne mampusua, "Mai, na isai na ieuta ria hae." ³⁶Yesusi waini iru-ruei pani lepa-lepa anoe nea, oyo ne mampusua oeu oarihoni sio hutue nau nakane nusue, oyo osaa opusu Yesusi pani lepa-lepa anoe. Nau rei iae, lepa-lepau tamena waromo oi. ³⁷Potuina tewa oyo, ihu onate erehoka. Kolau rahita-hita lepa-lepa rei, oyo kolau ranususo pani anoe rotutu haineke taue tau tihu nea. ³⁸Pani lepa-lepa rei, nene muie, Yesusi waipani inekei, inaka

unui roe kanakuru Sio mampusua ohanui, oyo oasau ata, "Matuhetene, ano mo, anomu iake? Mka imokota nea reini?"

³⁹Yesusi ihanui, oyo isopo ihute rei iasau ata, "Nakane. Apurumenea! Amaturua!" Oyo ihute rematurui runa nakane eremanu nea. ⁴⁰Oyo Yesusi iasau tau ne mampusua, "Omi okaitau ta hae? Sapani na oparisaa tewa ta hae?"

⁴¹Oyo sio okaitau runa oasei tau umau, "Ia reimo, ia sia? Ihute runa kolau iae, rapusu ia ne maue."



Ihu Mainae Nau Nakane Kalilea

Yesusi Ne Kawasa Inei Sakahatena

5 Oyo sio ohokaso ria Nakane Kalilea ria hae, ria tihue Kerasa. ²Yesusi runa ne mampusua osipu oarihoni sio no lepa-lepa rei, oyo ia isa waini sakahatene eresuniki ihokai pani Yesusi iarihoni hatu

nohua. Pani hatu nohua rei, sio oaunutu sio matana. ³Ia rei iruei pani hatu nohue anoe. Sio oamkona kanihooi tewa nea. Tau rante iae, oamkona kanihooi tewa nea. ⁴Naone sio okanihoo hanai runa aini atua, ne ia iuna roha rante rei rerihoni hanai, oyo ikuparehi rante rerihoni aini atua honu. Ia rei iamkona, reiso sio oapamese kuai tewa nea. ⁵Tau ranie, tau pumono, ieu-ieui pani hatu nohua rai sirinia. Roe pupua iakapona runa ihita ruai tau hatu rotutu ne apata.

⁶Reiso inoo Yesusi wainau hainau asi. Oyo irumai mai tanui, irike tune mai uai anoe, nanie irui muirani osiki. ⁷Irike tune oyo, iakapona nioi mainae ata, "Yesusi, Anahatana Waini Ia Aihuhue Anai, ano nanie auna sae osiku? Au uainisi tau Anahatana nanai, pene aunihehi unihuoku." ⁸Iasau sani rei tau Yesusi iasau osiki ata, "Ano sakahatene, ahoka aarihoni ia tumata reini." ⁹Oyo Yesusi iasei tau ia, "Ano nanamu sia?" Iasau ata, "Nanaku 'Panesi', tau ami panesi reini." ¹⁰Oyo iai-ainisi rerihoni Yesusi, "Pene aaisosima na ahoka aarihoni naniama reini."

¹¹Ne hahu panesi waroni ranina muaine roe pupue isa haineke sio. ¹²Sio sakahatena raini oainisi tau Yesusi, "Aaisosima aeu anusu hahu panesi rai." ¹³Reiso iaisosiso sani rei, oyo sio sakahatena rai raeu rarihoni ia hanaie rei, oyo ranusu hahu panesi rai. Hahu raimo nihi ua. Ranusure, oyo hahu rai raruma ramusu pupue nene sanene rei, oyo ramnahuso on roe tatepie. Ramnahuso on roe tatepie, oyo ranususo poe nakane, oyo ramokoso.

¹⁴Oyo sio mamsaka hahu rai orumaso, nanie osima osi sio ria niane runa sio noi nisiu. Osima oyo, sio pusiso ohokaso nanie onoo. ¹⁵Hoka nau oyo, onoo ia hanaie waini naone sakahatena rasuniki. Iruei poe, iausahu ne apia, imukei tewa nea. Sani rei oyo, sio pusiso okaitau. ¹⁶Oyo sio onoo pusire on sinasi rei oruni-runi osiso rerihoni Yesusiinei sio sakahatena rerihoni ia hanaie rei. Runa rerihoni iaisosire ranusu hahu rai. ¹⁷Oyo sio pusiso oainisi tau Yesusi ata ieu iarihoni no naniao rei.

¹⁸Reiso Yesusi isaa sio no lepa-lepa wani sinasi rei, oyo ia waini naone sakahatena rasuniki iainisi nanie ipusui. ¹⁹Ne Yesusi iamanaku tewa. Iasau ata, "Anunia, asima osi me ipane taue rerihoni Upumu iuna

sae osia runa anoi runaya." ²⁰Reiso ieu iarihoniki, oyo iruni-runi pani tihue Niana Hutusa rerihoni Yesusi iuna sae osiki. Sio pusiso osira oatinui.

Yesusi Iuna Ia Matane Iamahaiki Honu

²¹Oyo Yesusi inuni isaa lepa-lepa nau nakane nau hae. Hoka nau oyo, sio panesi oamanouso ohoi Yesusi nau nakane nusue. ²²Ia onate isa pani numa mananoue osi sio Yahuriu waini nanai Yarusi ihokai. Hoka poe, inoo Yesusi, oyo iamnohoi mai uai anoe. ²³Iainisi tau Yesusi ata, "Anaku pina ikupui mtinte. Masi apusu au, aakahuui tau hanamu, na ikarihuru. Pene imatai." ²⁴Reiso ieu ipusui.

Sio panesi opusu Yesusi honu. Sio rei oesei on nau, on ria. ²⁵Tau sio panesi rei, waini ia pina ikupui nasi erehoka musum hutusa rahana ua nea. ²⁶Ieui pani sio mamsuisene panesi, rotutu ia ne kepeni runa ne apia pusire. Ne ia iake tewasi. Kupue rei rekapena mtinte sirinia. ²⁷Ia iatinu sio oruni-runi rerihoni Yesusi. Reiso ieu tau muie haineke Yesusi, oyo isii ne papite. ²⁸Iahata pani anoi, "Au usii ne papite mani, oyo au iake nea."

²⁹Reiso isii ne papite, oyo nasi erehoka tewa nea. Iahana ata ia waini iake nea. ³⁰Oyo Yesusi oi iahana ata ia ne patane mirike mkane. Reiso inoo sio panesi rei, oyo iasei, "Ia sia isii au we papite?"

³¹Sio mampusua oasau ata, "Anoo sio hutue rei oesea tea? Reiso ano aasei ia sia isii me papite?" ³²Ne Yesusi ino-nooso, nanie isupu ia waini isii ne papite. ³³Oyo ia pina rei ianei ia waini iake nea, reiso ikananunu tau ia ikaitau isima runa ruai. Oyo iamnohoi pani Yesusi uai anoe, iainaa runai, oyo isima pusire. ³⁴Reiso Yesusi iasau osiki ata, "Anaku, tau ano aparisaa runa au, ano iake nea. Aeu noi, aakarihuru. Ano akupua tewa nea."

³⁵Reiso waini ianamana osiki asi, oyo sio ohokaso on pani Yarusi, ia onate waini sinasi rei, ne numa. Hoka poe oyo, oasau ata, "Anamu pina imatai nea. Pene aakarema me matuhetene nea."

³⁶Ne Yesusi iatinu tau rai tewa, oyo iasau osi ia onate rei ata, "Pene kaitau. Parisaa mani." ³⁷Oyo Yesusi isopo sio panesi rei, na pene

opusui. Hasae Petu, Yakopi, runa wanini, Yohanesi, tonuso ruao mani, isoposo tewa.

³⁸Reiso sio ohokaso poe ia onate rei ne numa. Hoka poe oyo, sio onoo sio panesi ouna purie mainae nai osa. Wasoni orani oasanoata. ³⁹Oyo Yesusi inusu pani numa rei, iasei tanuso, "Omi ouna purie runa orani oasanoata, nanie ta hae? Ia iki pina rei imatai tewa. Waini inekei mani." ⁴⁰Iasau sani rei, oyo sio oaumaniki. Reiso iaisosi sio pusiso ohokaso. Oyo ikata ia iki pina rei amai runa inai runa sio mampusua tonu rei pani ia matane rei. ⁴¹Oyo inana ia matane rei hanai, iasau osiki ata, "Talita kum" (nene manariti, "Anaku pina, ahanua.") ⁴²Oyo ia iki pina hehuke rei ihanui. Ihanui, oyo ieui. (Ia ne musum hutusa rahana ua nea.) Sio pusiso onoo, osira. ⁴³Oyo Yesusi isopo sio pusiso na pene oruni-runi osi ia sia mani. Oyo iasau ata, "Pana ia iki pina rei."

Yesusi Ne Niane Openeso Tanui

6 Yesusi ieu iarihoni naniai rei, oyo inuniki mai ia ruai ne niane ikata ne mampusua. ²Hoka poe oyo, tau ranie hatae rei iaranahata ia mato iatuheteso pani numa mananoue osi sio Yahuriu. Sio tika onata wasoni pani rei. Iatuheteso, oyo sio wasoni oatinui, osira nai osa. Sio oasei, "Ia rei, isupu ne maunauna raini on supa? Ianei panesi rai on supa? Sapani na imaha iuna sima-simana?" ³Ia rei, waini ia mamnana numa. Maria anai. Yakopusi, Yosesi, Yurasi, runa Simoni kakai. Nea hotau oi orue mai rei." Reiso sio openeso oatinu tau ia nea.

⁴Oyo Yesusi iasau tau sio, "Ia mamruni Anahatana ne anamanaya, sio orui muirani osiki sui supan-supani. Hasae ia ruai ne niane, ne ipane, nea enau oamuirai tewa." ⁵Tau niane rei, Yesusi iuna sima-simane isa tewa, hasae isuisene sio kupua mkana iahusieso tau hanai. ⁶Isira ata sio oparisaai tewa. Oyo Yesusi ieu ihori niana-niana iatuheteso.

Yesusi Iaisosi Sio Hutusa Rahana Ua Oaunau

⁷Yesusi ianaha runa sio hutusa rahana ua rei, oyo iaisosiso oeuso sana ua-ua. Irui kawasa osiso na sio onei sakahatena. ⁸Iaisosiso sani rei, "Pene orori saisa. Pene orori muaine te, tasi te, kepeni te. Pene. Hasae orori toka-toka. ⁹Oausahu sanraliu. Ne pene orori papita ua. ¹⁰Munata omi onusu pani numa isa, orue tau numa rei rotutu omi oeu oarihoni niane rei. ¹¹Ne munata omi ohoka noi niane isa, oyo sio oararumamo tewa runa openeso oatinu tau omi, oeu oarihoni niane rei. Oasamau una heu tapune rerihoni aimo atua na sio oanei ata Anahatana inoo sio osana. Sio osana tau sio oatinu tau ia ne maunaune tewa."

¹²Reiso Yesusi ne mampusua hutusa rahana ua rei, oeu oaunau ata kahurae sio mansiau oarihoni no rosau. ¹³Oeu onei-nei sakahatena panesi runa ososa-sosa sio kupua tau wekatisie na osuiseneso.

Yohanesi, Ia Mamsohue, Imatai

¹⁴Aia Herore oi iatinu rerihoni Yesusi ne atata tau sio panesi oanei Yesusi nanai sui supan-supani. Sio umau oasau ata, "Yohanesi, ia mamsohue, waini iamahaiki honu! Tau rei, ia ne kawasa iuna sima-simana rai." ¹⁵Ne sio tamena oasau sani rei, "Ia Elia." Sio umau honu oasau, "Ia waini ia mamruni Anahatana ne anamanaya isa sani sio mamruni masuae."

¹⁶Herore iatinu tau rei, oyo iasau, "Manisate, ia rei Yohanesi, ia mamsohue waini naone au uaisosiso oroto roha unui. Ia waini iamahaiki honu."

¹⁷Naone Herore iaisosi sio umau osota Yohanesi runa onusui pani pui. Tau sae? Herore inana wanini Pilipusi sahai, nanai Heroriasi. Tau rei, Pilipusi imatai tewasi. ¹⁸Reiso Yohanesi iasau-iasau osiki, "Anahatana itapia tewa ata ano anana wanimu sahai."

¹⁹Reiso Heroriasi iakapuku tau Yohanesi, nanie ihunui. Ne Herore inetei na pene ihunui. ²⁰Herore iaisosiso osaka Yohanesi ia-ia na pene sio oakaremai. Tau sae? Herore ikaitau Yohanesi. Ianei ata Yohanesi, ia manisate runa irui ruai osi Anahatana nea. Pannuhu Yohanesi

ianamana, Herore ne suka iatinu tau ia, masike anoi eresama-samai tau ne anamanaya oi.

²¹Oyo Heroriasi isupu arena na ihunu Yohanesi. Pannuhu Herore ne musum manisata, iuna karisaa oyo, ianaha runa sio onata rerihoni kupania, sio soratatua, runa sio onata pusiso kua tihue Kalilea. ²²Tau karisaa rei, Heroriasi anai pina inoiki, oyo Herore runa sio onata pusiso oasumatai iake. Reiso Herore iasau tau ia pina hehuke rei, "Ano nanie aainisi sae rerihoni au na au uruiki osia? Asau mai." ²³Oyo Herore isopa ruai sani rei, "Sae mani wani ano aainisiki, mka au uruiki osia masike au we tuamane samatihue oi!" ²⁴Oyo ia pina hehuke rei ihokai rerihoni sio panesi rei nanie iasei tau inai, "Ina, nene iake au uainisi sae?" Inai on poe iasau, "Ainisi Yohanesi, ia mamsohue rei, unui."

²⁵Mata hun tewa oyo, ia pina hehuke inuniki mai Herore, oyo iasau, "Au uainisi Yohanesi, ia mamsohue rei, unui. Aroriki san-sana mai. Aanutui roe loyani!"

²⁶Iatinu tau ne mainisie rei, oyo Herore anoi mtinte. Ia nanie ipenei, ne isopa ruai, oyo sio wasoni opusu karisaa rei oatinui nea. ²⁷Reiso iaisosi ia mamhunue isa inana Yohanesi, ia mamsohue, unui. Reiso ia mamhunue rei, ieui poe pui, oyo iroto roha Yohanesi unui. ²⁸Iroto roha unui, samatoro irori unuke rei tau loyani, oyo iruiki osi ia pina hehuke rei. Oyo ia pina hehuke rei irui unuke rei osi inai honu. ²⁹Yohanesi ne mampusua oatinu tau rei, oyo oeu onana Yohanesi ne patane, samatoro oaunutui pani hatu nohue.


Yesusi Ne Kawasa Ipana Sio Panesi

³⁰Sio maisosia rei onuniso, oyo oamanouso osima osi Yesusi rerihoni sio no atata pusire runa sio oatuhete sae. ³¹Sio panesi ohokaso mai Yesusi, oyo sio umau onuniso, rotutu ia runa ne mampusua oai mosa tewa. Reiso Yesusi iasau osiso, "Oeu mai, na ieuta noi oto huie isa na omi oaranahamo mkane." ³²Reiso sio osaa lepa-lepa, oyo oeuso pani oto huie. ³³Ne sio panesi onoo sio oeuso rerihoni tihue rei, oyo sio oationaso. Reiso, sio panesi rerihoni niana pusire pani tihue reipa oruma opusu kaimenne naone, nanie osupu

Yesusi runa ne mampusua. ³⁴Hoka pani oyo, Yesusi sio osipuso rerihoni no lepa-lepa rei, oyo inoo sio hutue rei. Inooso anoi runaso. Tau sae? Sio sani rompau no mamsakae tewa. Reiso iatuhete panesi osiso.

³⁵Tau ranie manne nea, sio mampusua oasau osiki ata, "Haineke pumono nea. Otoe rei huie. ³⁶Nene iake ano aaisosi sio panesi rei oeuso na sio ohane muaine sui niana mai tihue reini."

³⁷Ne Yesusi iasau ata, "Omi ruamo opanaso." Oyo sio oasau, "Ira oe! Ami ahane poroti tau sio panesi rei sapani? Arai ranana kepeni panesi."



Porotiu Hua Nima Runa Ika Use Ua

³⁸Oyo Yesusi iasei, "Oeu onoo. Porotiu hua ina waromo?" Sio oeu onoo, oyo osima ata, "Porotiu hua nima waroni runa ika use ua." ³⁹Oyo Yesusi iaisosi sio pusiso orue tumun-tumun poe mono maraya. ⁴⁰Sio pusiso orue tikan-tikana. Sio utuni oamanouso tau osa. Sio hutu nima oamanouso tau osa. ⁴¹Oyo Yesusi inana porotiu hua nima runa ika use ua rai, oyo iarinaa roe nante, iasau ata, "Amaku, ano iake. Ano arui muaine rei osima." Iasau sani rei oyo, ikuparehi porotiu rai mkana-mkana tau hanai, oyo iruire osi ne mampusua, nanie ata sio osamare osi pusiso. Oyo isama ika use ua osi pusiso oi. ⁴²Oyo sio pusiso oaiso rotutu tiao pokona nea. ⁴³Sio pusiso oaiso suka, oyo sio mampusua oamanou nesia rerihoni porotiu runa ikaya rai. Nesia rai, sio oamanoure tau pakuna hutusa rahana ua rotutu taua. ⁴⁴Tau sio panesi rei, sio hanaia, sio mainaya nihi nima oai muaine rei runa sio pinau runa sio ikina oi.

Yesusi Ne Kawasa Ieui Roe Nakane Hahae

⁴⁵Mata hun oyo, Yesusi iaisosi ne mampusua oeuso naone tau lepa-lepa pani niane Pesaira, pani hae. Yesusi ruai nanie iaisosi sio hutue onuniso. ⁴⁶Oyo sio pusiso onuniso samatoro Yesusi ieu roe pupue, nanie ianamana runa Anahatana. ⁴⁷Pumono pani sani rei oyo,

sio mampusua runa no lepa-lepa wasopa nakane tihue. Ne Yesusi ruai waira kaimenne asi. ⁴⁸Inoo ata sio omankaeso, osai kua no lepa-lepa tewa nea tau ihute on pani uae. Oyo tau kinoke, ieui pani tanuso. Ieu tau aini roe nakane hahae. Hoka pani oyo, ieui sani nanie inikuso. ⁴⁹Pannuhu sio onooi ieu ipusu nakane hahae sio ata ia sakahatene. Reiso oasanoata. ⁵⁰Tau sae? Sio onooi, oyo okaitau hun ruao. Mata hun oyo, iasau ata, "Apamese anomo. Au reini mo, au Yesusi tea? Pene okaitau." ⁵¹Oyo isaa pani tanuso, pani lepa-lepa anoe rei. Isaa oyo, ihute rei rematurui. Sio mampusua osira hun ruao. ⁵²Tau sae? Potusi Yesusi inana porotiu hua nima iunare panesi. Sio oanei tewasi sima-simane rei nene manariti sapani. Sio oanei saisa tewasi.

⁵³Reiso sio ohokaso pani hae, oyo opesi hatu aie pani tihue wani nanae Kenesareti. ⁵⁴Hoka pani oyo, osipuso rerihoni lepa-lepa rei, oyo sio pusiso pani rei oationa Yesusi. ⁵⁵Reiso sio ohori tihue rei, orori sio kupua mai Yesusi tau no kinoa arai. Munata sio oatinu ata Yesusi wai pani naniai isa, sio orori sio kupua pani naniai rei. ⁵⁶Sui supani mani Yesusi ihokai, noi niana, noi nisiu, sio orori sio kupua pani naniai. Sio oamanouso sui osa. Oyo sio oainisi na pene Yesusi isopo sio kupua osii ne papite aie. Masike hasae ne papite aie iae. Sio pusiso osiiki, iake.

Yesusi Iatuheteso Rerihoni Sae Wani Ereuna Ita Ikitatal Tau Anahatana Matal Usene

7 Sio onata rerihoni akama Yahuri runa sio matuhete Musa ne maunauna mato ohokaso rerihoni kota Yeruselemi, oamanouso mai Yesusi. ²Sio rei onoo Yesusi ne mampusua umau oaiso osohu hanao naone opusu noa upu no monne tewa.

³Sio onata rei runa sio Yahuriu pusiso opusu ia-ia no monna rerihoni noa upu. Reiso sio oaiso tewasi osohu hanao opusu monne tewasi. ⁴Sae wani ohane noi pasar, sio oaike tewa osohui tewasi. Sio orime kuru no monna panesi rerihoni noa upu sani osohu no koinanaya, piruna, runa parteniu.

⁵Reiso sio onata runa sio matuhete Musa ne maunauna oasei tau Yesusi, "Ano me mampusua opusu re monne rerihoni rea upu tewa, nanie ta hae? Sapani na sio oaiso osohu hanao opusu monne tewasi?"

⁶Yesusi isana sani rei, "Omi oasei oreaku. Masuae Yesaya iruni iaunutu anoi manisate rerihoni omi. Iahata Anahatana iasau sani rei,

'Sio reini, oamuiraku hasae roe hohao mani,
ne sio anoo hainau runa au.

⁷Sio orike tune oainaa runa au tau saisa tewa
tau sio oatuheteso runa tumatau no maunauna
sani au we maunauna.

Aikee au we maunauna sani rei tewa.'

⁸Anahatana ne maunauna, omi oarihonire. Ne tumatau no monna omi orime kurure."

⁹Oyo Yesusi iasau honu, "Omi oanei ia-ia openemo tau Anahatana ne maunauna runa omi opusu ruamo mo monna. ¹⁰Musa iaunau sani rei nea, 'Amuira amamu runa inamu.' Runa, 'Ia sia mani ianamana kahatene rerihoni amai runa inai, kahurae omi oaresiki, oyo ohunui.' ¹¹Ne omi oaunau sani rei, munata ia isa iasau tau inai te amai ata, 'Sae mani kahurae au uruiki osimo, au uruiki osi Anahatana nea.' ¹²Omi oasau ata iake, ia rei iakahai inai runa amai tewa. ¹³Reiso tau monne sani rei, omi oruiki osiso, omi ouni Anahatana ne maunauna. Omi mo atata panesi sani rei."

¹⁴Oyo Yesusi ianaha runa sio panesi honu samatoro iasau, "Oatinu na oanei! ¹⁵Saisa wapani manahane, kani erenusui mai anori ereuna ita ikitatai tau Anahatana matai usene tewa. Ne sae mani erehokai rerihoni tumata, areimo ereunai ikitatai tau Anahatana matai usene. ¹⁶Reiso munata ano tinamu ukuna mo, aatinu."

¹⁷Yesusi iarihoni sio panesi rei, oyo inusui pani numa isa, samatoro ne mampusua oasei rerihoni mamruni matuhetene nene manariti sapani. ¹⁸Reiso Yesusi iasau osiso, "Omi oanei tewasi? Omi oanei tewa ata sae mani ita iaiki ereunata ikitatai tewa? ¹⁹Sae wani ita iaiki erenusu pani tiari mani, oyo ieu heui." Tau anamanaya rai Yesusi iasau ata ita iai muaina pusire iake.

²⁰Oyo Yesusi iasau honu, "Sae mani wani erehoka rerihoni anori, areimo ereuna ikitatai. ²¹On pani anori rahoka heu kahatena sahoro rauna ita iamanea, ikimanaka, ihunu, ²²isahu-sahu, nanie inana sio no apia, iakahate, iakarota, iamuiira tewa, ianana, iruni mansia nanai, ihati ruari, iarinii tewa. ²³Kahatena rai rahoka rerihoni anori, oyo rauna ita ikitatai tau Anahatana matai usene."

Ia Pina Iparisaa Mainae

²⁴Oyo Yesusi ieu iarihoni tihue rei, nanie ieu poe haineke niane Tirusi. Hoka poe oyo, inusu iaahuniki pani numa isa. Ipenei tau sio oanei ata ia waini ihokai nea. Aikee sio oatinu ata waipo nea. ²⁵Mata hun tewa oyo, ia pina isa iatinu ata waini ihokai nea, reiso ihokai mai tanui. Hoka mai oyo, iamnohoi mai uai anoe. Ia pina rei anai pina isa, sakahatene eresuniki. ²⁶Ia pina rei, ia Yahuri tewa. Ia rakane. Ianamana sou Yunani, iamrai poe tihu otoi isa nanae Penisia poe Siria. Reiso iamnohoi mai uai anoe iainisi nanie Yesusi inei sakahatene rei rerihoni anai pina. ²⁷Oyo Yesusi ianamana rerihoni sio Yahuriu sani sio ikina iahata, "Kahurae sio opana sio ikina naone. Iake tewa sio onana sio ikina no muaine, oyo opesiki osi asu." ²⁸Isana ata, "Titue upuku. Ne asu poe tuamane raai muaine nesia waroni sio ikina osiruheure." ²⁹Iahata, "Ano asana iake, reiso masi anunia, sakahatene erehokai rerihoni anamu pina nea."

³⁰Oyo inuniki. Ihokai pani numa, oyo isupu anai pina rei inekei roe nanai. Sakahatene rei erehokai rerihoni ia iki pina rei nea.

Yesusi Isulsene Ia Ririene Mouke

³¹Oyo Yesusi iarihoni tihue haineke niane Tirusi, oyo ieu poe niane Sironi, oyo ieu honu ria tihue Niana Hutusa, samatoro ihokai mai Nakane Kalilea. ³²Hoka mai oyo, sio umau orori ia ririene mouke isa osiki. Sio oainisi ata Yesusi iakahuui tau hanai. ³³Yesusi inana ia ririene mouke rei ruai rerihoni sio hutue wasoni rei, oyo Yesusi isipa hanai nakata pani ia ririene mouke rei tinai ukuna. Oyo ihuto isii meini. ³⁴Isiiki,

samatoro iarinaa roe nante, inuse saina, oyo iasau osiki tau ia ne sou, "Epata." Nene manariti, "Heka nea." ³⁵Iasau sani rei, oyo tinai ukuna raheka. latinu iake nea. Meini manne nea. lanamana iake nea. ³⁶Oyo Yesusi isopo na pene oruni-runi osi ia sia mani. Yesusi isoposo sui osa sui osa. Ne sio oruni-runi suru ria, suru nau osi sio panesi sirinia. ³⁷Oyo sio pusiso oatinu, osira nai osa. Sio oasau ata, "Ira oe. luna pusire iake. luna sio wasoni oarieso oatinu, runa sio wasoni mouka oanamana."

Yesusi Ipana Sio Nihu Ate

8 Tau muie rei, sio hutue oamanouso honu. Sio no muaine tewa, reiso Yesusi ioi ne mampusua, oyo iasau, ²"Au anoku runa sio hutue rei. Sio okata au onona ua nea rotutu sio no muaine tewa nea. ³Kani au uaisosiso onuniso tau oaiso tewasi, mka sio omankaeso sui arena tihua. Sio umau mo, orueso hainau." ⁴Sio mampusua oasei tau Yesusi, "Mai oto huie reini mo, ami mka asupu muaine erelai tau sio pusiso on supa?" ⁵Yesusi iasei, "Omi mo porotiu hua ina rano?" Sio oasau ata, "Hua itu."

⁶Reiso Yesusi iaisosi sio hutue rei oru-rueso poe tuamane, oyo inana porotiu hua itu rai, iasau tau Anahatana, "Ano iake. Ano arui porotiu rai osima." Iasau sani rei oyo, ikuparehi porotiu rai mkana-mkana tau hanai, samatoro iruire osi ne mampusua rei, oyo osama-samare osi sio pusiso. ⁷Sio no ika ikina mkana oi. Yesusi iasau tau Anahatana, "Ano iake. Ano arui ikaya rai osima." Oyo iaisosi ne mampusua rei osamare oi. ⁸Sio oaiso rotutu tiao pokona nea, oyo sio mampusua oamanou muaina nesia tau paku onata itu rotutu taua. ⁹Tau sio panesi rei wasoni sio hanai mainaya nihiu ate runa sio pinau runa sio ikina oi. Sio oaiso pusi, oyo Yesusi iaisosiso onuniso. ¹⁰Iaisosiso onuniso, oyo isaa no lepa-lepa runa ne mampusua, oyo osai rotutu ohokaso nau tihue wani nanae Ramanuta.

Sio Mampusua Oanei Tewasi Ia Sia Irul Kawasa Osi Yesusi Na luna Sima-simana

¹¹Sio onata rerihoni akama Yahuri ohokaso mai Yesusi nanie otuntana runai. Sio nanie oreai, reiso oainisi ata iuna akakinae sani sio no kawasa rerihoni Anahatana, na sio oanei ata kani ihokai on roe Anahatana te tewa. ¹²Yesusi inesa nahai pani anoi, oyo iasei, "Omi napisi reini mo, oainisi sima-simane na oanei ata au on roe Anahatana, nanie ta hae? Au upeneku uuna sima-simane sani rei osimo."

¹³Oyo isaa pani lepa-lepa anoe honu, oyo isaiki poe hae iarihoni sio rei.

¹⁴Ne Yesusi ne mampusua anoo kanihua orori poroti, hasae poroti hua osa wapani lepa-lepa rei. ¹⁵Iaisosiso sani rei, "Oatinu ia-ia. Ainati na sio onata rerihoni akama Yahuri runa Herorasi no mnehue." Mnehue rei, areimo ereuna poroti eresaa.

¹⁶Reiso sio oasei tau umau, "Iasau sani rei, nanie ta hae?" Oyo oapamata sou ata iasau sani rei tau sio anoo kanihua orori poroti. ¹⁷Yesusi ianei sio oasau sapani reiso iasei, "Omi oanamana rerihoni ita re poroti tewa, nanie ta hae? Omi oanei tewasi? Anomo makaya reiso oanei tewasi? ¹⁸Omi mo, aikee matamo usena, onoo tewa? Omi aikee mo tinamo ukuna, oatinu tewa? Anomo rapeka runa saisa tewa? ¹⁹Naone au ukuparehi porotiu hua nima mkana-mkana osi sio nihiu nima, oyo omi oamanou nesia tau pakuna ina rotutu taua?" Sio on poe oasau, "Pakuna hutusa rahana ua taua." ²⁰Ita tau muie honu au ukuparehi porotiu hua itu mkana-mkana osi sio nihiu ate, oyo omi oamanou nesia tau pakuna ina rotutu taua?" Sio on poe oasau, "Pakuna itu." ²¹Iasei honu, "Ne omi oanei tewasi ia sia iauwatuku?"

Yesusi Isulsene Ia Mata Putle

²²Oyo Yesusi runa ne mampusua oeuso poe niane Pesaira. Hoka poe oyo, sio umau oautunu ia mata putie isa osi Yesusi, nanie oainisi Yesusi iahusiei na iake. ²³Reiso Yesusi irime hanai, ihokai rerihoni niane rei. Oyo Yesusi ihuto matai usena, oyo iahusiei. Iahusiei, oyo iasei tau ia, "Ano anoo saisa nea?" ²⁴Oyo inoo roe uae, iasau ata, "Au unoo sio

umau sani ai tinaia, ne sio wasoni oeu suru ria suru nau." ²⁵Ia Yesusi iahusie matai usena honu tau hanai. Oyo ia mata putie rei inoo iake. Matai raputiso tewa nea. Inoo relalopo tewa nea. ²⁶Oyo Yesusi iaisosiki inuniki, iasau ata, "Pene anuni noi niane rei nea."

Petu Iamanaku Yesusi Sani Ia Anahatana Iratiki Iuna Ita Ikarihuru

²⁷Yesusi runa ne mampusua oeu ohori tihue Kaisarea Pilipi. Sio wasoni oeu, oyo Yesusi iasei tanuso sani rei, "Sio oasau ata au reini mo, au sia?" ²⁸Sio on poe oasau ata, "Sio umau oasau ata ano mo, ano Yohanesi, ia mamsohue, sio umau honu oasau ata ano mo, ano Elia, runa sio tamena umau honu oasau ata ano mo, ano mamruni Anahatana ne anamanaya isa." ²⁹Oyo Yesusi iasei tau sio, "Ne pusu omi ruamo oasau, au reini mo, au sia?" Oyo Petu on poe iasau ata, "Ano sahoru Ia Anahatana Iratia Auna Ami Akarihuru!" ³⁰Oyo Yesusi isopo na pene osima osi sia-sia mani, pene osima rerihoni Yesusi, ia sia.

Yesusi Ianutu Anoi Rerihoni Mka Imatai Sapani

³¹Oyo Yesusi mato iatuhete ne mampusua ata, "Kahurae Au, Tumata Reini Mo, Anahatana Ihitiku ukahi-kahiku panesi. Mka sio onata, sio imam onata, runa sio matuhete Musa ne maunauna openeso tau au. Mka sio ohunuku, oyo onona ua, oyo uamahaiku honu." ³²Iasau sani rei na sio oanei iake iasau sapani. Reiso Petu inana Yesusi ruai. Petu iakapuku tanui, reiso inana ruai, oyo iasau sani rei, "Pene anamana sani rei."

³³Ne Yesusi iuniki, oyo inoo sio mampusua. Iakapuku tau Petu, reiso iasau ata, "Masi aeu aarihoni au, Setani. Ano aasau sani rei, ano aarinii pusu tumata, ano aarinii pusu Anahatana tewa." Ioi Petu tau Setani tau Setani ipenei tau Yesusi imatai.

³⁴Oyo Yesusi ianaha runa sio panesi wasoni pani rei runa ne mampusua, oyo iasau sani rei, "Ia munata nanie ikata au, kahurae ia rei anoi kanihue runa ruai runa ipusu ruai ne maue tewa. Oyo ihana ne ai

wani reniene. Kahurae irui ruai ikahi-kahiki imatai sani ihana ai rei. Oyo kahurae ipusu-pusu au. ³⁵Ia munata ipenei irui ruai ikahi-kahiki imatai, mka imatai, oyo iruei hainau rerihoni Anahatana. Ne munata ia isa irui ruai na iaunauso tau Maunau lake rerihoni Anahatana, oyo mka iamahaiki rotutu ria supani haineke Anahatana. ³⁶Masike ia isa isupu arataeu pusire mai tuniai reini, ne mka imatai iruei hainau rerihoni Anahatana. Arataeu rai tau sae? ³⁷Masike isenu ne arataeu pusire iae, mka iruei haineke Anahatana tewa.

³⁸Tau napisi reini mo, wani kahatene runa oarihoni Anahatana na oainaa runa sio tamena, munata ia isa iaumaa isima ata iparisaa tau au runa au we maunauna, Au, Tumata Reini Mo, Anahatana Ihitiku, mka uaumaa usima ata au uationa ia rei oi. Mka uhokaku, oyo sio onooku. Onooku ita-itaku runa kawasa rerihoni Anahatana. Uhokaku runa sio maisosia on roe noiyaha wasoni orui ruao osi Anahatana. Mka uhokaku sani rei, au peneku usima ata au uationa ia rei.

9 Au nanie uasau, sio umau wasoni okata au mai rei, mka omataso tewasi samatoro sio onoo Anahatana iuna natu mai tuniai reini tau ne kawasa."

Yesusi Imuineniki

²Reiso nomerei sani rei oyo, Yesusi ikata Petu, Yakopusi, runa Yohanesi, tonuso, iautunuso roe tineta pupue ateso ruao. Hoka roe oyo, noi sio mata kahutua, oyo Yesusi imuineniki. ³Ia ne apia ita-itana, puti tun-tunna. Ia mapatoi apia isa mai tuniai reini ianei papa apia puti tunna sani rei tewa. ⁴Oyo ne mampusua rei tonuso onoo Yesusi ianamana runa Elia na Musa. ⁵Oyo Petu iasau osi Yesusi, "Matuhetene, ita mai rei iake. Nene iake ami anana numa wesia tonu, isa osi ano, isa osi Musa, runa isa osi Elia." ⁶Iasau sani rei tau ianei tewa kahurae iasau sapani. Tau sae? Tonuso okaitau hun ruao.

⁷Oyo yahu erehoriso runa sio oatinu nioke on pani yahu rei ereasau ata, "Ia reini mo, au anaku. Au anoku runai. Oatinu aarihoni ia!" ⁸Oyo sio ono-noo suru roe suru poe san-sana, ne sio onoo ia isa waini ikata sio tewa nea. Hasae Yesusi ruai mani. ⁹Pannuhu omusu on roe

tinetae rei Yesusi isoposo sani rei, "Pene oruni-runi osi ia sia mani rerihoni omi onoo sae mai rei on au, Tumata Reini Mo, Anahatana Ihitiku, uamahaiku honu tewasi."



Yesusi lanamana Runa Elia Na Musa

¹⁰Sio opusu ne maunaune, reiso osima osi ia isa tewa. Ne tonuso ruao oasei tau umau, "Iasau ata mka iamahaiki honu. Areimo sapani?" ¹¹Reiso sio oasei tanui, "Sio matuhete Musa ne maunauna oasau ata kahurae Elia ihokai naone, nanie ta hae?" ¹²Yesusi on poe iasau ata, "Titue. Elia ihokai naone na ipamanisa pusire na iaka. Reiso sapani na sio okanu tau Anahatana ne anamanaya ata Au, Tumata Reini Mo, Anahatana Ihitiku, mka sio ouna au ukahi-kahiku panesi runa sio openeso tanuku? ¹³Ne au mo, uasau osimo ata ia isa sani Elia ihokai

nea, ne sio ouna kahatene osiki opusu ruao no maue sani masuae sio okanui."

Yesusi Isuisene Ia Ikiine Isa Waini Sakahatene Eresuniki

¹⁴Yesusi runa ne mampusua tonu rei ohokaso poe sio mampusua tamena, oyo sio onoo ata sio hutue wasoni oamanouso poe rei. Sio matuhete Musa ne maunauna wasoni otuntana runa sio rei. ¹⁵Mata hun oyo, sio pusiso onoo Yesusi osira, oyo orumaso mai Yesusi, nanie orui tapea osiki. ¹⁶Yesusi iasei tau sio, "Omi wani otuntana runa sae tau sio?"

¹⁷Ia isa rerihoni sio hutue rei iasau ata, "Matuhetene, au uautunu anaku mai ano. Sakahatene eresuni anaku reini, oyo iakumoui. ¹⁸Sui supani mani sakahatene rei eresotai, ererau-raui poe tuamane, kahusea rahokaso rerihoni hohai, ereuna nesini rani otoso, runa tinaini rerimuniki. Au uainisi ata ano me mampusua oneiki, ne sio omaha tewa."

¹⁹Reiso Yesusi iasau tau sio, "Omi mo masike, omi napisi reini mo, oparisaa tewa. Rotutu inasa kahurae au urue runamo. Rotutu inasa kahurae au uapamese omi? Oautunu ia ikine reino mai."

²⁰Reiso sio oautunu ia ikine rei mai Yesusi. Sakahatene rei erenoo Yesusi, oyo ia ikine rei ikana-kananunui rotutu iamnohoi poe tuamane, ikama-kamauniki, kahusea rahokaso rerihoni hohai. ²¹Oyo Yesusi iasei tau amai, "Ia sani reini potuina nea?" Amai iasau ata, "On ia ikine asi. ²²Sakahatene rei ereninai, nanie erehunui sui osa reiso ereunai iamnohoi pani usa te pani waene. Ne kani ano amaha auna saisa, anomu runa ami na aakahaima." ²³Yesusi iasau, "Ano aasau kani ano amaha tau sae? Ita imaha iuna sae mani, hete sae, iparisaa." ²⁴Amai iasau san-sana ata, "Au uparisaa mkane. Akahaiku na au parisaa mainae."

²⁵Yesusi inoo sio panesi ohoka oruma oamanouso, oyo iaisosi sakahatene rei. Isopoi ata, "Ano sakahatene auna iakumoui runa iaririei, au uaisosia ahokaya rerihoni ia ikine rei na pene asuniki nea." ²⁶Sakahatene rei rekapona, oyo ereuna ia ikine tinaini erekananunui,

samatoro ihokai rerihoni ia ikine rei. Erehokai oyo, sio onoo ia ikine rei sani matane. Reiso sio panesi oasau ata, "Imatai nea!" ²⁷Ne Yesusi irime hanai, ihetui, oyo ia ikine rei ihanui, ihitio roe.

²⁸Yesusi inusui pani numa, oyo ne mampusua rei ruao ohokaso mai Yesusi oasei, "Ami amaha anei sakahatene rei tewa tau sae?"

²⁹Yesusi iasau ata, "Sakahate nitae reini mo, ita ineiki hasae tau mainisie."

Yesusi Ianamana Rerihoni Mka Sio Ohunui

³⁰Yesusi runa ne mampusua rei oeu oarihoni naniao rei oeuso sui tihue Kalilea. Ne Yesusi ipenei tau sio oanei ata ia waipani ihokai nea. ³¹Tau sae? Nanie iatuhete ne mampusua ruao. Iahata, "Au, Tumata Reini Mo, Anahatana Ihitiku, mka sio oruiku osi tumata ne kawasa, oyo ohunuku. Ne onona ua, oyo uamahaiku honu." ³²Sio oanei tewa iasau sapani, ne sio omoniki oasei tanui.

Pene Otuntana Rerihoni Ia Sia Sahoro Ia Mainae

³³Oyo sio ohokaso mai niane Kapanau. Tau Yesusi waipani numa nea iasei tau ne mampusua, "Omi otuntana rerihoni sae sinasi poe arena tihue?" ³⁴Ne sio oamaturuso mani. Sio oaumaa osima tau sio otuntana rerihoni ia sia sahoro ia mainae poe arena tihue rei. ³⁵Iuei poe, oyo ioi ne mampusua hutusa rahana ua rei, oyo iaunauso sani rei, "Ia sia nanie iuna mainae, kahuræ ia inuniki tau muie runa iakahai sio pusiso."

³⁶Oyo Yesusi inana ia ikine isa iautunui kua tihue, oyo ihetei iasau osiso sani rei, ³⁷Ia isa anoi runa ia ikine sani rei tau anoi runaku, areimo sani anoi runa au sirinia. Runa ia anoi runa au, ia anoi runa au ruaku tewa. Anoi runa ia sahoro iaisosiku oi."

³⁸Oyo Yohanesi iasau osi Yesusi, "Matuhetene, ami anoo ia isainei sakahatena tau ihete nanamu. Ia waini inei sakahatena rei, ia tamene, reiso ami asopoi tau ikata ita tewa."

³⁹Ne Yesusi iasau, "Pene osopoi. Munata ia isa iuna sima-simana tau ihete nanaku, oyo mata hun oyo, ianamana kahatene tanuku tewa. ⁴⁰Tau sae? Ia ituntana runa ita tewa, ia rei runa ita. ⁴¹Au uasau manisate. Ia sahoro iakahaimo mkane sani irui tihu osimo na omi oninui tau omi opusu Au, Ia Anahatana Iratiku Unaso Okarihuru mka ia mamrui tihu rei, isupu sae wani Anahatana iruiki osi sio onana tanei osiki."

⁴²Iake tewa sio okanihoo hatu mainae roe ia isa tionai, oyo opesiki nau nuae. Ne areini iake erenesi sae wani mka Anahatana iuna runa ia waini iuna ia mainae tewa iparisaa runa au tewa nea. ⁴³Munata hanamu atue ereuna ano apalalosa, aroto rohai. Nene iake aamahaia rotutu ria supani haineke Anahatana runa hanamu atue osa mani. Iake tewa sio opesia poe usa mainae hainau rerihoni Anahatana runa hanamu atua uare. Usa rei, eremata tewa rotutu ria supani. ⁴⁴Poe rei, usa eremata tewa, uneu ramataso tewa. ⁴⁵Munata aimu atue ereuna ano apalalosa, aroto rohai. Nene iake aamahaia rotutu ria supani haineke Anahatana runa aimu atue osa mani. Iake tewa sio opesia poe usa mainae hainau rerihoni Anahatana runa aimu atua uare. ⁴⁶Poe rei, usa eremata tewa, uneu ramataso tewa. ⁴⁷Munata matamu usene ereuna ano apalalosa, apekui. Nene iake ano arue akata Anahatana tau iuna natu mai tuniai reini runa matamu usene osa mani. Iake tewa sio opesia poe usa mainae hainau rerihoni Anahatana runa matamu usena uare. ⁴⁸Poe rei, usa eremata tewa, uneu ramataso tewa.

⁴⁹Sani usa erepasanisi hunahane, mka au uamanisa sio pusiso wasoni opusu au kani sio okahi-kahiso. ⁵⁰Tasie iake. Ne munata ereniniki, ita iaiki iahana sani tasie tewa nea. Reiso omi sani tasie ereniniki rei kani omi otuntana rerihoni ia sia, ia mainae. Pene otuntana runa umau. Orue anomo ramaturuso runa umau."

Yesusi Iatuheteso Rerihoni Ia Isa Iarihoni Sahai

10 Oyo Yesusi ieu iarihoni tihue rei, nanie ieuia tihue wani nanae Yurea, oyo ieuia Wae Yorani ria hae. Hoka ria oyo, sio panesi ohoka oamanouso mai tanui. Iatuheteso sani rei sirinia.

²Sio onata rerihoni akama Yahuri ohokaso mai Yesusi, oyo oreai, nanie onoo ata kani ianamana pusu Musa ne maunauna te tewa. Reiso oasei sani rei, "Pusu Musa ne maunauna, ia isa itapiki iarihoni sahai te tewa?" ³Yesusi isana sani rei, "Musa iaisosimo sapani?" ⁴Oyo oasau ata, "Musa itapi ia hanaie ikanu surate nanie iarihoni sahai, oyo iaisosiki ieui." ⁵Ne iasau sani rei, "Musa ikanu sani rei tau anomo makaya runa omi openemo opusu Anahatana ne maunauna. ⁶Ne on Anahatana ihaye tau tuniai reini mo, ereasau sani rei, 'Anahatana ihaye mansia hanaie runa mansia pina. ⁷Reiso ia hanaie iarihoni inai runa amai, oyo ikata sahai, ⁸inoo uaso sani sio osa mani.' Sio ua tewa nea. Ne sio osa mani. ⁹Reiso sae wani Anahatana iunai osa, pene tumata irohaso."

¹⁰Tau sio wasoni pani numa nea, ne mampusua oasei tau ia rerihoni rei. ¹¹Iasau sani rei, "Munata ia hanaie isa iarihoni sahai, oyo inana ia pina tamene isa, ia reimo isahu-sahu sahai rei. ¹²Munata ia pina isa iarihoni sahai, oyo inana ia hanai tamene isa, ia iae isahu-sahu sahai oi."


Ita Ihokata Mai Anahatana Sani Ia Ikinē

¹³Sio wasoni orori sio ikina mai Yesusi na iahusieso runa iainisi Anahatana irui iake osiso. Ne sio mampusua oakapuku tanuso. ¹⁴Yesusi iatinu sani rei reiso anoi eresaa, iasau ata, "Sio ruao. Sio ikina ohokaso mai tanuku iake. Pene osoposo. Tau sae? Sio sani sio ikina rei, mka orue okata Anahatana tau ia iuna natu mai tuniai reini. Sio ikina oararuma Anahatana iake. ¹⁵Nene manisate, ia ipenei iararuma Anahatana sani ia ne natu sani ia ikine iararumai, ia mka iruei haineke Anahatana tewa." ¹⁶Oyo iheteso samatoro iahusieso. Iahusieso, oyo iainisi Anahatana irui iake osiso.

Ia Kupani

¹⁷Yesusi ieui nea, oyo ia isa ihokai irumai mai tanui. Irike tune mai uai anoe, nanie irui muirani osiki, oyo iasei, "Matuhetene, ano mo iake. Kahurae au uuna sae na uamahaiku rotutu ria supani?" ¹⁸Oyo Yesusi

iahata, "Ano aasau ata au iake, nanie ta hae? Ita tumatau mo, ita iaka tewa. Hasae Anahatana ruai sahoro ia iake. ¹⁹Ano aanei nea Anahatana iaisosita sapani, 'Pene ohunu. Pene osahu-sahu. Pene okimanaka. Pene oakarota oruni oreta tumata nanai. Pene oakarota na anana ia isa ne apia. Oamuiira moa amau, moa inau." ²⁰Iahata, "Matuhetene, au upusu pusire nea on au ikine asi." ²¹Yesusi ino-noo anoi runai, oyo iasau ata, "Nesi maunaune osa mani kahurae ano apusui. Masi aeua na aheni pusi me numa hutae. Aheni pusi me numa hutae rei, oyo asama pusi kepeni rai osi sio mosokinia na ano asupu arataeu roe noiyaha. Oyo aeu mai na apusu-pusu au." ²²Oyo ikanahatai. Ieui anoi mtinte. Tau sae? Ne numa hutae panesi.



Makapana Mainae Nanae Unta

²³Yesusi ino-nooi, oyo iasau osi ne mampusua, "Mtinte sio kupani opusu tau Anahatana iuna natu mai tuniai reini." ²⁴Ne mampusua osira oatinu tau anamanya rai. Ne Yesusi isakanau sani rei, "We hehuka, mtinte omi opusu tau Anahatana iuna natu mai tuniai reini. ²⁵Mtinte tau makapana mainae nanae unta erenusui sui sisunue matae. Ne mtinte erenesi rei, sio kupani opusu tau Anahatana iuna natu mai tuniai reini."

²⁶Oyo sio osira hun ruao, reiso sio oasei tau umau, "Ira oe. Kani ia sia mka ikarihuru runa ipusu tau Anahatana iuna natu omi?" ²⁷Yesusi inooso honu, oyo iasau ata, "Tumatau oanei ouna karihuru ruao tewa ne Anahatana ianei pusire." ²⁸Oyo Petu iasau, "Ami mo, aarihoni pusi-pusire nea na apusu-pusu ano." ²⁹Yesusi iasau ata, "Au uasau osimo. Sio oarihoni no niane, noa kakau, noa waniu, noa inau, noa amau, no hehuka, runa atuhu, ai nohua, rusuni, pusakau iae, tau anoo runaku runa nanie oaunauso tau Maunau lake rerihoni Anahatana, ³⁰mka tau muie rei osupu panesi rerihoni waroni oarihonire naone. Mka osupu niana utuni, noa kakau noa waniu utuni, inau utuni, sio ikina utuni, nisiu utuni. Ne sio umau ouna sio okahi-kahiso tau sio oparisaa runa au. Oyo pani muie rei mka oamahaiso rotutu ria supani. ³¹Ne sio panesi sio ata sio mainaya muie reini, mka sio mainaya tewa nea. Runa sio panesi sio ata sio mainaya tewa muie reini, mka sio mainaya nea."

Yesusi Ianamana Honu Rerihoni Mka Sio Ohunui

³²Yesusi runa ne mampusua wasoni oeuso roe kota Yerusalemi. Yesusi ieu ianaone, sio mampusua oeuso hae muie. Sio osira. Sio panesi wasoni opusu hae muie okaitau oi. Oyo Yesusi inana ne mampusua ruao iasau osiso rerihoni mka ia sapani. ³³Iahata, "Atinu. Ita wani ieu roe Yerusalemi. Roe rei, Au, Tumata Reini Mo, Anahatana Ihitiku, mka sio oruiku osi sio imam onata runa sio matuhete Musa ne maunauna. Mka sio oasau ata kahurae sio ohunuku, oyo oruiku osi sio wasoni oationa Anahatana tewa. ³⁴Oyo sio wasoni oationa Anahatana tewa rei oaumaniku, ohutoku, osapuku tau awane unia, oyo ohunuku. Ohunuku oyo, onona ua oyo, uamahaiku honu."

Yakopusi Runa Yohanesi Nanie Ouna Alau Okata Yesusi Tau Iuna Natu

³⁵Oyo Sepereusi ne hehuka, Yakopusi runa Yohanesi, ohokaso mai Yesusi. Sio oasau, "Matuhetene, ami nanie aainisi saisa arihonia na ano aunai osima." ³⁶Oyo Yesusi iasei, "Omi nanie ata au uuna sae osimo?" ³⁷Sio oasau, "Ami nanie auna aiau arue mai hanamu wanane

runa hanamu pante pannuhu sio pusiso oanei ata ano auna natu tau sio pusiso." ³⁸Yesusi on poe iasau ata, "Omi oanei tewa omi oainisi sae. Omi oamkona oapamese okahi-kahimo omatamo sani mka umataku?" ³⁹Sio on poe oasau, "Ami aamkona aapamese." Reiso Yesusi iasau honu, "Titue. Omi mka okahi-kahimo omatamo sani mka umataku. ⁴⁰Ne rerihoni ia sia mka iruei mai hanaku wanane, hanaku pante, au we kawasa uasau tewa. Anahatana sahoro iasau ia sia iuna aia ikata au. Ianei nea ia sia ihitiki."

⁴¹Sio mampusua hutusa tamena oatinu tau rei, oyo anoo rasaa tau Yakopusi runa Yohanesi. ⁴²Reiso Yesusi ianaha runa sio pusiso, iasau sani rei, "Omi oanei ata sio onata rerihoni niana wasoni oationa Anahatana tewa ouna mtinte tau no mansiau. Sio rei sahoro no kawasa oaisosi no mansiau suru ria suru nau sui osa. ⁴³Ne pene omi sani rei. Ia sia mani rerihoni omi nanie iuna mainae, kahurae ia rei iakahai sio pusiso. ⁴⁴Ia sahoro nanie iuna mainae rerihoni omi, kahurae iuna manorine tau sio pusiso. ⁴⁵Ne Au, Tumata Reini Mo, Anahatana Ihitiku iae, uhokaku na sio oakahaiku tewa. Au uhokaku uakahai sio, oyo umataku na uusi sio panesi no rosau."

Yesusi Isulsene Paratimeu

⁴⁶Sio ohokaso pani niane Yeriko. Pannuhu Yesusi, ne mampusua, runa sio panesi oarihoni niane rei, ia mata putie isa iru-ruei mai arena nusue, iainisi kepeni rerihoni sio wasoni onikuso. Ia nanai Paratimeu, Timeu anai. ⁴⁷Iatinu ata Yesusi, ia Nasareti, waini inikui, reiso iakapona, "Yesusi, Raure upui, anomu runa au."

⁴⁸Ne sio panesi osopoi, oaisosiki iamaturui. Ne sio osopoi, iakapona kuati sirinia, "Raure upui, anomu runa au."

⁴⁹Oyo Yesusi iataehe, oyo iasau, "Ooiki mai." Reiso sio ooi ia mata putie rei. Sio oasau osiki ata, "Apamese anomu. Yesusi waini ioia, hitio roe." ⁵⁰Ia mata putie rei ipesi rie papite osa, oyo ihitioi san-sana ieu mai Yesusi. ⁵¹Yesusi iasei tanui, "Au nanie uuna sae osia?" Ia mata putie rei iasau ata, "Upuku, au nanie unoo." ⁵²Reiso Yesusi iasau, "Tau ano


aparisaaku, ano iake nea." Inoo iake san-sana. Inoo iake, oyo ipusu Yesusi sui arena rei.



Ia Mata Putie Isa Iainisi Kepeni

Yesus Inusu Yerusalemi

11 Yesusi runa ne mampusua wasoni haineke kota Yerusalemi nea, mai niana Petapake runa Petania, mai Pupue Saituni nene san aikune. Pani rei Yesusi iaisosi ne mampusua ua oeuso naone. ²Yesusi iasau ata, "Oeumo nau niane wanau uae rei. Mka omi onusumo nau niane rei, oyo omi onoo makapana isa nooi sani naitana ikine sio okanihooi. Ia isa isaa makapana rei tewasi. Osuhai, oyo onesai mai. ³Ne munata sio oasei tanumo, omi nanie osuha makapana rei, nanie ta hae, oasau osiso, 'Upuma nanie isaai. Mka san-sana mai iuniki.'"



Makapana Sani Naitana Ikine

⁴Reiso uaso oeuso. Hoka nau oyo, osupu makapana rei. Sio okanihooi mai numa nene mitanunue, paka arena nusue. Reiso uaso osuhai. ⁵Osuha oyo, sio umau wasoni oooso pani rei oasei tau sio ua rei, "He. Omi ouna sareno? Omi osuha makapana rei, nanie ta hae?" ⁶Sio oasau sani Yesusi iaisosiso sinasi. Reiso sio nau rei osoposo tewa. Oyo uaso onesa makapana rei.

⁷Hoka ria Yesusi, oyo sio oaunutu no papita osa roe nene totu hahae samatoro Yesusi isaai. ⁸Sio panesi orata sio no papita osa poe arena. Sio umau oi orata ai totua poe arena. Ai totua rai, sio ororire on noi nisiu. Sio orata papita runa ai totua sani rei tau sio nanie orui muirani osi Yesusi sani sio orui muirani osi sio onata runa aiau. ⁹Yesusi isaa makapana rei roe papita runa ai totua nanie inusui pani Yerusalemi. Sio umau oeuso pani uae, sio umau hae muie. Sio pusiso oakapona. "Ainaa runa Anahatana. Arui iake osi ia waini ihokai tau

Upuma nanai. ¹⁰Ia rei ihokai, mka iuna natu sani masuae upuma Raure, ia aia. Ainaa runa Anahatana waini ia mainae nai osa."



Yesusi Isaa Makapana Roe Papita Runa Ai Totua

¹¹Reiso Yesusi ihokai mai Yerusalemi, oyo inusui pani Anahatana ne numa. Pani numa anoe ino-noo pusire. Ne haineke pumono nea reiso ieui ria niane Petania ikata ne mampusua hutusa rahana ua rei.


Yesusi Iatanima Runa Ai Tinaie

¹²Ne hanroe sio wasoni oeu oarihoni niane Petania, oyo Yesusi imakaneai. ¹³On pani hainau inoo ai tinaie isa. Ai rei nene nanae ara. Ai rei nene totua panesi. Reiso ieui pani ai ara rei, nanie inoo ata kani nene huae. Ne ihokai pani ai nusue rei, isupu saisa tewa. Hasae ai totua mani. Tau muie rei, ai ara nene musum rei huae tewasi. ¹⁴Reiso Yesusi iasau tau ai ara rei, "On ranie hatae reini, pene ia isa iai ai huae rerihoni ano nea!" Yesusi ne mampusua oatinu ne anamanae rei.

Yesusi Inelso Rerihoni Anahatana Ne Numa

¹⁵Oyo sio ohokaso roe kota Yerusalemi. Hoka roe oyo, Yesusi ieui honu roe Anahatana ne numa. Hoka roe numa rei nene nusue, oyo ia matoinei sio pusiso wasoni oaheni runa ohane roe tihue rei. Ia iuni hehi meya waroni sio otuka kepeni runa sio manaheni manu samane no katerau. ¹⁶Ia isa waini tapiki irori sae mani pusu Anahatana ne numa nusue tewa. ¹⁷Oyo Yesusi iatuhete sio panesi kua tihue rei. Iasau, "Anahatana ne anamanaya, sio okanu sani rei, Anahatana iasau ata, 'Au we numa, mka sio ooiki tau numa mainisie osi sio tuniai pusiki.' Ne omi ouna Anahatana ne numa sani sio kimanakana naniaol!" ¹⁸Sio imam onata runa sio matuhete Musa ne maunauna, sio oatinu rei. Oyo sio onina arena nanie ohunu Yesusi. Sio oanana tanui tau sio mansiau pusiso osira oatinu ne anamanaya.

¹⁹Ne mka-mka mono sani rei, Yesusi runa ne mampusua oeuso oarihoni kota rei.



Anahatana Ne Numa

a. Numa

e. Numa Nusue

Ai Ara Erekalmeniki

²⁰Nene hanroe omnano tunne, sio oeu oniku ai ara rei, oyo onoo ai rei erematai nea rotutu nene namta rakaimeni pusire. ²¹Oyo Petu anoi erepeka runa Yesusi ne anamanae sani potusi rei, oyo iasau osi Yesusi, "Matuhetene, masi anoo! Ai ara wani ano aatanima runai potusi rei, erematai nea!" ²²Yesusi on poe iasau, "Kahurae omi oparisaa tau Anahatana. ²³Nene manisate, omi oasau tau tinetae reini, 'Ahitioa runa apesi ruamu nau nuae!' Oyo mka tinetae rei erepesi ruae nau nuae, hete sae, omi pene ouna pie-pie, runa omi oparisaa ata wani omi oasau rei ata omi oaisosi tinetae rei erepesi ruae nau nuae, mka erepesi ruae. ²⁴Tau rei, anomo rapeka runa rei, ne munata omi oainisi saisa rerihoni Anahatana kahurae oparisaa ata Anahatana iruiki osimo nea. Oyo mka osupui. ²⁵Runa sani omi oainisi, ne anomo ramaturu tewa tau sio umau, anomo kanihua runa ne masana osia naone na moa Ama roe noiyaha iae, anoi kanihue runa omi mo rosau. ²⁶Sani

openemo anomo kanihua runa sio tamena no masanau, moa Ama roe noiyaha iae, ipenei anoi kanihue runa omi mo rosau."

Sio Ona Yahurlu Oasel Rerihoni Yesusi Isupu Ne Kawasa Rerihoni Ia Sia

²⁷Sio ohokaso mai kota Yerusalemi honu, oyo tau Yesusi waini ieu ihori pani Anahatana ne numa nene nusue, oyo sio imam onata, sio matuhete Musa ne maunauna runa sio onata ohokaso mai tanui. ²⁸Hoka mai oyo, sio oasei sani rei, "Ano asupu me kawasa rei rerihoni ia sia na auna sani rei? Ia sia irui kawasa rei osia?"

²⁹Iahata, "Au nanie uasei honu tau pusimo utumo. Omi osima ee, samatoro au usima rerihoni usupu we kawasa rerihoni ia sia na uuna sani rei. ³⁰Ia sia sahoru iaisosi Yohanesi isohu tumatau, Anahatana te, tumata te? Masi aasau."

³¹Oyo sio otuntana runa umau sani rei, "Munata ita iasau ata Anahatana irui kawasa osiki na isohu tumatau mka iasei tau sae ita iparisaa runa Yohanesi tewa. ³²Ne munata ita iasau ata tumata, mka imatata." Sio okaitau sio panesi mka oasau sani rei. Sio panesi oahata Yohanesi, ia mamruni Anahatana ne anamanaya isa. ³³Reiso sio oasau sani rei, "Ami aanei tewa." Oyo Yesusi iasau ata, "Reiso au iae upeneku usima osimo rerihoni au usupu we kawasa na uuna sani rei."




Anggur Huaya

Yesusi Iaunau Sio Openeso Tanui Tau Mamruni Matuhetena

12 Oyo Yesusi iaunauso tau mamruni matuhetena. Iaunau sio imam onata, sio onata, runa sio matuhete Musa ne maunauna. Iasau ata, "Ia isa irahu nisi. Irahu nisi rei, tau atuhu anggur.


Inana tone erehori nisi rei, oyo ikani nonu na sio oheta tanure rotutu nene sanaute erehokai rerihoni huaya rai tau nonu rei. Oyo inana numa hatu naue na sio osaka nisi rei roe nene hahae. Oyo inana sio umau osaka ne nisi rei runa osama nene huaya osiki, oyo ieu iarihoni tihue rei.



Sio Oheta Tau Huaya Poe Nonu

²Tau musum tinou nea iaisosi ne manorine isa na ieu ria sio mamsaka nisi rei, nanie inana ne huaya umau. ³Oyo suru ria ieu. Ieui rotutu ihokai ria, oyo sio mamsaka nisi rei osotai oyo ohitai. Ohitai, oyo oaisosiki inuni nakui.

⁴Ita iaisosi ne manorine isa honu. Ita suru ria ieu. Ieui rotutu ihokai ria. Sio oamuirai tewa, reiso sio ohitai rotutu ne apate roe unui.



Numa Hatu Naue Na Sio Osaka Nisi Rei Roe Nene Hahae

⁵Ita iaisosi ne manorine tamene honu. Ita suru ria ieu. Ieui rotutu ihokai ria, oyo sio ohunui.


Ita iaisosi sio panesi, ia isa pusu ia isa. Ne sio umau sio ohitaso, sio umau, ohunuso. ⁶Iaisosi rotutu pusiso. Kani iaisosi ia sia honu? Nesi ia osa mani mai ne numa. Ia rei, ia ruai anai hanaie. Anoi runai. lahata pani anoi, 'Anaku rei, mka sio oamuirai.' Reiso iaisosiki. ⁷Ieu honu, oyo sio onooi oasau tau umau, 'Ia reimo, anai. Mka imatai, anai rei isupu ne tuamane rei. Mai, na ita ihunui na ruari isupu tuamane rei.' ⁸Reiso sio osotai, oyo ohunui. Ohunui, oyo opesi matane pani manahane rerihoni nisi rei.

⁹Ia ne tuamane rei, mka iuna sae? Ihokai mai nisi rei runa ihunu sio mamsakaya rei, oyo inana sio tamena osaka ne nisi honu. ¹⁰Omi onoo tau Anahatana ne anamanaya tewa raasau sani rei?

'Hatu tinipae wani sio mamnana numa openeso tanui ereuna hatu mata anoe. Ereuna numa makae nea.

¹¹Upuri iuna sani rei runa ita inooi iake."


Inana tone erehori nisi rei, oyo ikani nonu na sio oheta tanure rotutu nene sanaute erehokai rerihoni huaya rai tau nonu rei. Oyo inana numa hatu naue na sio osaka nisi rei roe nene hahae. Oyo inana sio umau osaka ne nisi rei runa osama nene huaya osiki, oyo ieu iarihoni tihue rei.



Sio Oheta Tau Huaya Poe Nonu

²Tau musum tinou nea iaisosi ne manorine isa na ieu ria sio mamsaka nisi rei, nanie inana ne huaya umau. ³Oyo suru ria ieu. Ieu rotutu ihokai ria, oyo sio mamsaka nisi rei osotai oyo ohitai. Ohitai, oyo oaisosiki inuni nakui.

⁴Ita iaisosi ne manorine isa honu. Ita suru ria ieu. Ieu rotutu ihokai ria. Sio oamuirai tewa, reiso sio ohitai rotutu ne apate roe unui.



Numa Hatu Naue Na Sio Osaka Nisi Rei Roe Nene Hahae

⁵Ita iaisosi ne manorine tamene honu. Ita suru ria ieu. Ieu rotutu ihokai ria, oyo sio ohunui.

Ita iaisosi sio panesi, ia isa pusu ia isa. Ne sio umau sio ohitaso, sio umau, ohunuso. ⁶Iaisosi rotutu pusiso. Kani iaisosi ia sia honu? Nesi ia osa mani mai ne numa. Ia rei, ia ruai anai hanaie. Anoi runai. Iahata pani anoi, 'Anaku rei, mka sio oamuirai.' Reiso iaisosiki. ⁷Ieu honu, oyo sio onooi oasau tau umau, 'Ia reimo, anai. Mka imatai, anai rei isupu ne tuamane rei. Mai, na ita ihunui na ruari isupu tuamane rei.' ⁸Reiso sio osotai, oyo ohunui. Ohunui, oyo opesi matane pani manahane rerihoni nisi rei.

⁹Ia ne tuamane rei, mka iuna sae? Ihokai mai nisi rei runa ihunu sio mamsakaya rei, oyo inana sio tamena osaka ne nisi honu. ¹⁰Omi onoo tau Anahatana ne anamanaya tewa raasau sani rei?

'Hatu tinipae wani sio mamnana numa openeso tanui ereuna hatu mata anoe. Ereuna numa makae nea.

¹¹Upuri iuna sani rei runa ita inooi iake."

¹²Reiso sio onata oatinu mamrunie rei nanie oaresi Yesusi. Sio oahata Yesusi ianamana tanuso. Sio sani sio mamsaka nisi runa sio mamnana numa tau sio openeso tau Yesusi. Ne sio okaitau sio panesi, reiso oeu oarihoni Yesusi.

Sio Onata Rerihoni Akama Yahurlu Runa Sio Rerihoni Herore Nanle Oamanaru Yesusi Ata Ianamana Kahatene Rerihoni Natu Kaisare

¹³Sio oaisosi sio onata rerihoni akama Yahuri umau runa sio rerihoni Herore umau, nanie ata oasei tau Yesusi na sio osotai ianamana kahatene rerihoni natu Kaisare. ¹⁴Sio ohokaso mai Yesusi, oyo oasau ata, "Matuhetene, ami aanei ata ano aamanisa. Anomu ereuponu tewa rerihoni tumata inoo ano sapani. Ano anoo pusima osa, ia isa mainae tewa. Ano aatuhetema tau Anahatana ne maunauna wani manisate. Anahatana itapita ata ita isenu pea osi natu Kaisare te tewa? Kahurae ita isenu te tewa?"

¹⁵Ne Yesusi ianei ata sio oasei reai, reiso iasau sani rei, "Omi nanie osotaku, nanie ta hae? Masi orori kepeni inate isa mai na unooi."



¹⁶Reiso sio orui inate isa osiki, oyo iasei, "Ia sia siaini reini? Sio okanu ia sia nanai tanui?" Sio oahata, "Kaisare." ¹⁷Iasau ata, "Reiso osenu osi Kaisare sae wani ia ne kawasa iainisiki runa orui osi Anahatana sae wani ne kawasa iainisiki." Sio osira oatinu tau rei.

Sio Saruklu Oasei Rea Tau Yesusi

¹⁸Sio Sarukiu umau ohokaso mai Yesusi. Sio rei oahata sio matana oamahaiso tewa honu. Reiso sio oasei sani rei, ¹⁹"Matuhetene, masuae Musa ikanu sani rei, 'Munata ia hanaie isa imatai, sahai isusu tewa, kahurae wanini inana ia pina uhanu rei na isusu, oyo onoo sio ikina sani kakai waini imatai rei ne hehuka.' ²⁰Reiso sani ia hanaie isa nea waniu sio nome. Ia rei, ia mana onete, iausahai, oyo imatai iarihoni sahai, sahai rei isusu tewasi. ²¹Ita wanini inana kakai sahai rei honu. Ita wanini rei imatai iarihoni ia pina rei, tau isusu tewasi. Ita wanini ia isa

honu inana ita sani rei sirinia, ²²rotutu ituso sani rei. Oyo tau muie ia pina imatai honu. ²³Tau ranie hatae rei sio matana oamahaiso honu, ia pina rei, mka ia sia sahai? Ituso onana ia pina rei nea!" ²⁴Yesusi iahata, "Omi osana rerihoni sio matana oamahaiso honu, sio sapani. Omi oanei tewa Anahatana ne anamanaya ereasau sapani. Omi oanei tewa Anahatana ne kawasa sapani. ²⁵Mka sio matana oamahaiso honu, sio oausahaso tewa nea. Sio sani Anahatana ne maisosia on roe noiyaha. ²⁶Rerihoni sio matana oamahaiso honu, omi onoo tewa Musa ne surate? Ikanu ata Anahatana ianamana osiki rerihoni ai pukune rei, wani usa ereai tanui. Anahatana iasau ata, 'Au wani Anahatana tau Aparahami^a, Anahatana tau Isaki^b, runa Anahatana tau Yakupi^c.' ²⁷Anahatana inoo sio rei sani sio oamahaiso, masike omataso nea. Reiso ia mo, waini Anahatana tau sio matana tewa. Ia Anahatana tau sio wasoni oamahaiso. Omi osana oasau ata sio matana oamahaiso tewa honu."

Ia Matuhete Musa Ne Maunauna Isa Nanle Ianei Maunau Sae Wani Mtinte

²⁸Oyo ia matuhete Musa ne maunauna isa iatinu sio otuntana. latinu ata Yesusi isana sio Sarukiu iake. Reiso iasei tanui, "Maunau sae wani mtinte rerihoni maunauna pusire?" ²⁹Iasau sani rei, "Maunau mtinte wani sani rei, 'Atinu omi Israeliu! Upuri Anahatana, ia osa mani. ³⁰Anomu runa Upumu Anahatana tau anomu pusiki, tau me inaha pusiki, aarinii runa ia sui osa, runa anana tanei osiki sui osa.' ³¹Maunaune isa honu, areimo sani rei, 'Anomu runa sio pusiso sani anomu runa ruamu.' Maunauna ua rai waroni mtinta ranesi maunauna pusire." ³²Oyo ia matuhete Musa ne maunauna rei iasau ata, "Titue, matuhetehe! Ano aasau manisate ata Upuri Anahatana ia osa mani runa anahatana tamene isa waimo tewa nea. ³³Kahurae ita anori runa Anahatana runa anori pusiki, iarinii runa ia sui osa, inana tanei osiki sui

^a Sio osai Aparahami tau sio Israeliu noa upu mata anee. Anahatana iaunutu hako nanle Irui tuamane osiki runa nea upu masike anai isa tewasi. Oyo anai Isaki iamrai.

^b Isaki amai tau Aparahami, inai tau Sara.

^c Yakupi amai tau Isaki, Isaki amai tau Aparahami.

osa, runa anori runa sio pusiso sani anori runa ruari. Ita iuna sani rei iake erenesi ita iakanupu sae mani te irui sae mani osi Anahatana." ³⁴Yesusi iatinu ata isana iake, nai osa, reiso iahata, "Ano haineke nea na mka apusu tau Anahatana iuna natu mai tuniai reini." Oyo sio pusiso okaitau oasei tau Yesusi nea.

Yesusi On Poe Iasel Tau Sio Onata Honu

³⁵Yesusi waini iatuhete pani Anahatana ne numa nusue, oyo iasei sani rei, "Sapani na sio matuhete Musa ne maunauna oasau ata la Anahatana Iratiki lunaso Okarihuru rei, ia Raure upui? ³⁶Aikee Anahatana Ne Inaha iuna Raure ruai iasau ata,

'Anahatana iasau osi Upuku:

Rue hae hanaku wanane

rotutu ano ahetu tau me nisau.'

³⁷Reiso munata Raure ruai ioi la Anahatana Iratiki lunaso Okarihuru tau Upui sani ia mana onete, sapani na ia hasae Raure upui muie mani?" Sio hutue oatinui iake. ³⁸Iasau osiso sani rei, "Ainati runa sio matuhete Musa ne maunauna. Sio nanie ata pusiso onooso sani sio mainaya, reiso sio oeu oasahu papi naue runa nanie ata sio oauhaaso sani sio mainaya noi pasar. ³⁹Sio nanie orue tau sio mainaya no katerau pani numa mananouna osi sio Yahuriu. Tau karisaa, sio nanie orue tau katerau waroni sio oaunuture osi sio wasoni sio orui muirani osiso. ⁴⁰Aikee sio oakarota sio pina uhanu runa onana no numau pusire. Sio oainisi roe hohao mani rotutu potuina ne oainisi pani anoo tewa. Mka Anahatana iapasanaso mtinte."

Ia Pina Uhanu Irui Kepeni Panesi Osi Anahatana

⁴¹Yesusi waini iru-ruei pani Anahatana ne numa iamanane peti kepeni waroni sio orui osi Anahatana. Iasumata sio onusu no kepeni tanui. Sio kupani panesi onusu kepeni panesi. ⁴²Oyo ia pina uhanu isa ihokai, la pina rei, imosokiniki. Inusu kepeni ikina, ina ua mani. Areimo kepeni panesi tewa, mkana mani. ⁴³Oyo Yesusi ioi ne mampusua,

iasau osiso ata, "Masi onoo. Ia pina uhanu waini imosokiniki rei, inusu kepeni panesi rerihoni sio kupani pusiso. ⁴⁴Sio kupani rei orui no nesia mani. Ne ia pina uhanu rei irui ne kepeni pusire. Kani iai sae honu?"

Yesusi Ianamana Akakinae Rerihoni Tunial Reini Erepena

13

Yesusi runa ne mampusua oeu oarihoni Anahatana ne numa nusue, oyo ne mampusue isa iasau sani rei, "Matuhetene, masi anoo. Anahatana ne numa rei, iake. Sio onanai tau hatu maina-mainaya waroni iaka." ²Oyo Yesusi iasau, "Omi onoo numa mainaya rai? Mka sio okuka Anahatana ne numa rei na hatu rai ratanuhaha tewa nea. Hatu rai rakukaso rarihoni nahaya."

³Oyo Yesusi ieu roe pupue wani nanae Saituni. Hoka roe oyo, irue iamanane Anahatana ne numa pani ekote hanae pani hae. Oyo Petu, Yakopusi, Yohanesi, runa Anreusi ohokaso pani tanui, nanie oasei tau sio ruao okatai. ⁴Sio oasei sani rei, "Masi aasau poe. Inasa sio okuka Anahatana ne numa sani ano aasau rei? Mka ami anoo akakinae sae naone na ami aanei ata sio nanie okukai nea?"

⁵Reiso Yesusi iaunauso sani rei, "Osaka-saka na pene sio oakarotamo oahata tuniai reini erepena nea. ⁶Mka sio panesi ohoka ohete au nanaku oasau ata, 'Au mo, wani la Anahatana Iratiku Uunaso Okarihuru' oyo oakarota sio panesi. ⁷Munata omi oatinu rerihoni manahitana mo, pene okaitau. Kahurae sani rei, aikee tuniai reini erepena tewasi. ⁸Mata anoe kupaniau oatana runa umau, niana oatana runa umau. Mai tuniai reini mo, isu sui supan-supani runa sio panesi omakaneaso tau sio osupu muaine tewa nea. Ne areini mo, pusire nene aikune mani sani ia ikine nanie iamrai inai tia ereuni.

⁹Kahurae omi osaka-saka. Mka sio osotamo runa oruimo osi sio mainaya tau niana. Mka sio ohitamo sui numa mananouna osi sio Yahuriu. Mka sio ororimo oamanane sio no kawasa runa sio aiau tau omi oparisaa runa au. Reiso oaunauso rerihoni au. ¹⁰Kahurae omi oaunau niana pusire mai tuniai reini tau Maunau lake naone. ¹¹Mka sio oaresimo, oyo ororimo oamanane sio onata, pene anomo rauponu rerihoni mka oasau sapani. Mka Anahatana iasau osimo kahurae omi

oasau sapani. Omi ruamo oanamana tewa, ne Anahatana Ne Inaha irui anamanaya osimo. ¹²Mka kakai irui wanini waini iparisaa tau au osi sio ohunui runa wanini irui kakai waini iparisaa tau au osi sio ohunui. Sani rei honu runa amai runa ne hehuka. Sio ikina mka orui amai runa inai osi sio ohunuso. ¹³Mka sio pusiso openeso tanumo tau omi oparisaa runa au. Ne ia sia iapamese rotutu imatai, mka iamahaiki rotutu ria supani haineke Anahatana.



Sio Oru-rueso Roe Numa Hahae

¹⁴Mka omi onoo sio oapuooh kahatene wani ereuna Anahatana iarihoni ne numa. Anahatana isopo na pene oapuoohi pani ne numa rei. (Ano wani anoo surate rei, aatinu ia-ia na aanei.) Sio oapuoohi, oyo

kahurae sio pusiso sui Yurea orumaso roe tinetae. ¹⁵Pene sio wasoni oru-rueso roe numa hahaya osipuso, oyo onususosio pani no numau honu na onana no apia. ¹⁶Pene sio noi nisiu onuniso, nanie onana no papita. ¹⁷Sio wasoni tiaos te wasoni osusu sio ikina asi pani muie reimo siraka. Oruma iake tewa. ¹⁸Ainisi na pene sani rei tau ihate. ¹⁹Pani muie reimo, sio okahi-kahiso mainae sani sio okahi-kahiso tewasi on tuniai reini eremrai asi. Oyo pani muie honu sio okahi-kahiso tewa nea. ²⁰Ne mka Anahatana anoi erepeka runa sio wasoni ininiso na sio oparisaa runa ia. Reiso itapiso okahi-kahiso rotutu potuina tewa. Sinana sio okahi-kahiso rotutu potuina, mka ia isa iamahaiki tewa nea.

²¹Tau napisi reimo, mka ia isa iasau osimo, 'Masi onoo. Ia Anahatana Iratiki lunaso Okarihuru waini ihokai nea' te ia isa honu iahata, 'Mai, ia wai pani rei.' Pene oparisaa tau sio rei. ²²Tau sae? Sio umau mka ohoka oasau oakarota ata sio rei wasoni ia Anahatana Iratiki lunaso Okarihuru te sio wasoni ia mamruni Anahatana ne anamanaya isa. Mka sio ouna akakinaya sani sio no kawasa rerihoni Anahatana runa sima-simana na sio onoo osira. Sio oakarota rea sio wasoni Anahatana ininiso na sio oparisaa runa ia. ²³Reiso osaka-saka. Au uatuhetemo nea tuniai reini mo erepena sapani on erepena tewasi.

²⁴Tau napisi reimo, sio okahi-kahiso, oyo ranie erepumonoi, hunane eresita tewa nea. ²⁵Oneu ramnahuso on roe nante runa sae wani roe nante rakoka. ²⁶Oyo sio pusiso onoo Au, Tumata Reini Mo, Anahatana Ihitiku uhokaku pani yahu tihue runa we kawasa. Sio onoo au uita-itaku. ²⁷Au mka uaisosi we maisosia on roe noiyaha na sio oamanou sio wasoni Anahatana ininiso na oparisaa runa ia. Sio oamanousosio on nau, on ria, on poe, on pani, oyo on pani tuniai nene rurue rotutu roe nante nene rurue.

²⁸Sani ita ianei ihate erehokai nea kani inoo roe ai isa. Inooi nene totua maraya nea runa nene kataunua manna nea, oyo mato resineui honu. ²⁹Sani rei oi tau tuniai reini erepena. Omi onoo sani rei, omi oanei ata mata hun oyo, tuniai reini erepena. ³⁰Uasau osimo. Sio pusiso wasoni oamahaisosio muie reini mo, omatasosio tewasi samatorosio

okahi-kahiso sani uasau rei. ³¹Nante runa tuniai reini mka ranikuso, ne au we anamanaya ranikuso tewa.

³²Ia isa ianei tewa inasa mka sio okahi-kahiso sani rei. Sio maisosia roe noiyaha oanei tewa. Au Anahatana anai iae uanei tewa. Hasae amaku ruai ianei. ³³Reiso ainati runa osaka-saka. Omi oanei tewa inasa uhokaku honu. ³⁴Areimo sani ia isa iarihoni ne numa, oyo ieui hainau. Ia rei iaisosi ne manorina runa irui kawasa osiso na osaka ne numa rei. Sio pusiso osupu no taneiu. Iaisosi ia mamsaka mitanunue isakai ia-ia. ³⁵Reiso osaka-saka. Omi oanei tewasi inasa numa upue inuniki. Kani tau ranie manne te? Tau saa monon tihu te? Tau manua ratunkeko te? Tau ranie eresaa te? Omi oanei tewa. ³⁶Pene rotutu uhokaku omi osaka tewa, oyo usupu pusimo onekemo. ³⁷Sae wani au uasau osimo, au uasau osi sio pusiso, osaka-saka."

Ia Pina Isa Isona Mina Roe Yesusi Unui

14 Nesi onona ua mani samatoro karisaa anoo rapeka runa noa upu oarihoni Mesire runa karisaa sio Yahuriu oai poroti eresaa tewa. Sio imam onata na sio matuhete Musa ne maunauna wasoni onina arena, nanie osota Yesusi puru-purumene na ohunui. ²Sio oasau ata, "Ne pene ita isotai tau karisaa rei. Tau sae? Mka pusiso oatana runa openeso oatinu tau ita."

³Reiso Yesusi waira niane Petania, ria Simoni, ia naone ia muhune, ne numa. Oyo ia pina isa ihokai mai Yesusi irori potone. Potone rei, sio ounai tau hatu. Sio oapatau potone rei tau mina. Sio ouna mina rei tau ai namte. Reiso Yesusi waini iaiki, oyo ia pina rei ihokai, ikuparehi potone tionae, samatoro isona mina rei roe Yesusi unui. ⁴Isona mina rei roe unui oyo, sio umau ria rei oakapuku tanui. Reiso oasei tau umau, "Ia pina rei iuna sai-sai mina sani rei, nanie ta hae? ⁵Mina rei, kani sio oaheniki, osupu kepeni panesi. Kepeni sani ia isa isupu tau musum osa. Kepeni rai, sio mka oruire osi sio mosokinia!" Reiso sio oakapuku tau ia pina rei.

⁶Ne Yesusi iasau ata, "Ia ruai! Omi nanie oakarupu tau ia pina rei, nanie ta hae? Ia ne atate rei osiku iake. ⁷Sio mosokinia wasoni

okatamo sui osa. Kani omi nanie, omaha oakahaiso sui osa. Ne au runa omi sui osa tewa. ⁸Ia pina rei iuna nea, pusire ia imaha iuna. Mka au umataku, oyo sio oaunutuku, ne ia pina rei isonaku tau mina ipusu monne naone. ⁹Manisate. Sui supan-supani mani mai tuniai reini, sio oaunauso tau Maunau lake rerihoni Anahatana, mka sio oatinu rerihoni ia pina rei na anoo rapeka runai."

Yesusi Iaiki Runa Ne Mampusua

¹⁰Oyo Yurasi Isakarioti, ia isa rerihoni sio mampusua hutusa rahana ua, ieui pani sio imam onata, nanie irui Yesusi osiso. ¹¹Sio nanie ohunui, reiso oatinu tau anamanae rei iake. Reiso osaka orui kepeni osi Yurasi. Oyo Yurasi inina arena, nanie irui Yesusi osiso.

¹²Tau ranie hatae mata anoe rerihoni karisaa sio Yahuriu oai poroti eresaa tewa. Tau ranie hatae rei sio ohunu rompau. Tau sae? Anoo rapeka runa noa upu oarihoni Mesire. Tau ranie hatae rei, sio mampusua oasei tau Yesusi, "Tau karisaa anori rapeka runa rea upu oarihoni Mesire, ano nanie aaia sui supa?"

¹³Reiso Yesusi iaisosi sio ua iasau ata, "Oeumo nau kota. Nau rei, mka osupu ia isa iasaoa tihu tau potone. Opusui ¹⁴rotutu noi numa wani inusui, oyo oasei tau numa upue, 'Upuri nanie ianei naniai wani sui supa tau ia runa ne mampusua nanie oaiso tau karisaa anori rapeka runa rea upu oarihoni Mesire.' ¹⁵Oyo mka ia iautuu kakarana onate roe naue osimo. Tau kakaranae rei, omi osupu katerau runa pusire nea. Roe rei oatanunu osita."

¹⁶Reiso uaso oeuso nau kota. Hoka nau oyo, sio osupu pusire sani Yesusi iasau rei. Oyo sio oatanunu muaine tau karisaa anoo rapeka runa noa upu oarihoni Mesire.

¹⁷Nene pumono pani sani rei oyo, Yesusi ihokai roe kakaranae rei runa ne mampusua hutusa rahana ua rei. ¹⁸Hoka roe oyo, oaiso. Sio wasoni oaiso, oyo Yesusi iasau ata, "Au uasau osimo, ia isa rerihoni omi reini waini iaiki runa au, mka iruiku osi sio wasoni nanie ohunuku." ¹⁹Oatinu tau rei, sio anoo runai. Ia isa iasei, "Ia reimo, au te sarei?" Oyo ia isa honu iasei, "Ia reimo, au te sarei?" rotutu sio pusiso oasei sani rei.

²⁰Oyo Yesusi iasau, "Ia rei, ia isa rerihoni omi hutusa rahana ua reini. Ia rei, waini inono poroti poe pirune osa runa au. ²¹Nene manisate, au, Tumata Reini Mo, Anahatana Ihitiku, mka sio ohunuku sani sio oaunutui noi Anahatana ne anamanaya. Ne ia saoro iruiku osi sio nanie ohunuku, ia siraka nai osa. Nene iake tau ia rei, pene iamrai nea."



Yesusi Iai Runa Ne Mampusua

²²Reiso sio wasoni oaiso, oyo Yesusi inana poroti. Inana poroti, oyo iainaa runa Anahatana iahata, "Amaku, ano iake. Ano arui poroti rei osima." Oyo ikihoi tau hanai, isamai osi ne mampusua, iasau ata,

"Onana poroti rei runa oai, areini au tinaiku." ²³Oyo inana koinanae. Iainaa runa Anahatana iahata, "Amaku, ano iake. Ano arui sanaute rei osima." Oyo irui koinanae osi ne mampusua. Sio pusiso oninu mkane. ²⁴Oyo Yesusi iasau, "Areini mo, au we nasi. Mka au matakau, au we nasi erenia na sio pusiso oanei ata Anahatana iuna tau sio sani masuae iaunutui hako. Au we nasi rei erenia tau sio panesi. ²⁵Au uasau osimo, au uninu sanaute rei tewa nea samatoro uninui honu runamo tau Anahatana iuna natu mai tuniai reini." ²⁶Oyo sio ohete ahinae oainaa runa Anahatana samatoro oeuso roe pupue wani nanae Saituni.



Nisi Kesemani Runa Ai Saituni

Petu Iakanihu Nanai

²⁷Oyo Yesusi iasau osiso, "Mka omi pusimo oruma oarihoni au. Tau sae? Sio oaunutui tau Anahatana ne anamanaya ata Anahatana iasau sani rei,

'Mka au uhunu ia mamsakae,
oyo ne rompau pusiso orumaso sakakau.
Sio umau suru ria. Sio umau suru nau.'

²⁸Ne mka au uamahiaku honu, oyo au ueu naone poe Kalilea. Mka omi oeumo tau muie." ²⁹Petu iasau ata, "Masike sio pusiso oeu oarihonia iae, mka au mo ueu uarihonia tewa." ³⁰Oyo Yesusi iasau ata, "Nene

manisate, mka-mka pumono, manue eretunkeko nai ua tewasi oimo, ano aasau ata ano aationa au tewa, rotutu nai tonu nea." ³¹Petu isopo mtinte, "Masike au matakun runaya, manisate upeneku uasau ata au uationaya tewa!" Oyo ne mampusua pusiso oasau sani rei sirinia.

Yesusi Iainisi Ria Kesemani

³²Oyo sio oeuso ria nisi wani nanae Kesemani. Hoka ria oyo, Yesusi iasau osi ne mampusua, "Oru-ruemo mai rei na au ueu uariamana runa Anahatana."

³³Oyo Yesusi ikata Petu, Yakopi, runa Yohanesi oeuso runai. Oyo anoi ereuponu. Iahana anoi mtinte nai osa. ³⁴Iasau osiso ata, "Anoku mtinte nai osa. Uahana nanie umataku nea. Onapa mai rei runa osaka."

³⁵Oyo Yesusi ieu i hainau mkane, samatoro irike tune poe tuamahe, nanie irui muirani osi Anahatana, oyo iainisi. Iainisi roe Anahatana kani ia ne ukuro rerihoniki. ³⁶Iasau ata, "Ama, amaku, ano amaha auna pusire. Anana we ukuro rei rerihoniku. Ne pene apusu au we mauē. Apusu ano me mauē."

³⁷Oyo Yesusi inuniki pani ne mampusua sio tonu rei. Isupuso wasopo onekeso. Iasei tau Petu, "Simoni, anekea? Au ueu uarihonimo potuina tewa, ne ano amaha asaka-saka tewa?" ³⁸Oyo Yesusi iasau osiso ata, "Osaka runa oainisi na pene ia isa ireamo na pene opalalosa. Manisate, anomo nanie rauna manisata, ne omi omaha tewa tau tinaimo ramankaeso."

³⁹Oyo ieu iarihoniso honu, nanie iainisi sani sinasi rei. ⁴⁰Iainisi pusi oyo, inuniki honu pani tonuso. Isupuso onekeso honu. Tau sae? Sio matao mtinta. Reiso sio oanei tewa oasau sapani osi Yesusi.

⁴¹Yesusi inuniki mai tanuso nai tonu, oyo iasei, "Omi onekemo oaranahamo asi? Omi onekemo erelai nea. Mata hun oyo, sio orui au, Tumata Reini Mo, Anahatana Ihitiku, osi sio wasoni opalalosa.

⁴²Ohanumo roe na ieuta. Onoo ia waini iruiku ihokai nea."

Sio Osota Yesusi

⁴³Yesusi waini ianamana asi, oyo Yurasi, ia isa rerihoni sio hutusa rahana ua rei, ihokai san-sana runa sio mansia hutue. Sio rei orori tunua runa kahitata. Sio rei rerihoni sio imam onata, sio matuhete Musa ne maunauna, runa sio onata tamena. ⁴⁴Yurasi, ia mamrui Yesusi, iasau osiso naone, "Ia waini omi oninai, mka au umukiki na omi oanei ia sia. Osotai, oyo ororiki. Osakai ia-ia."

⁴⁵Yurasi ihokai, oyo ieu i san-sana mai Yesusi iasau, "Upuku." Oyo imukiki. ⁴⁶Imukiki oyo, sio osotai runa oaresiki. ⁴⁷Ia isa waini haineke sio, isaru ne tunue, oyo iseha ia imam onate ne manorine tinai totue warohai. ⁴⁸Oyo Yesusi iasei tanuso "Omi ata kani au uaisosiso na pene oatinu runa kupania runa pene opusu kupania ne mauē? Tau rei, omi orori tunua runa kahitata nanie osotaku?" ⁴⁹Ranie hatae isa au uatuhete, hanroe, pouarei honu au uatuhete roe Anahatana ne numa nusue na omi onoo. Ne omi osotaku tewa. Ne omi osotaku sani rei sani Anahatana ne anamanaya raasau." ⁵⁰Oyo sio mampusua pusiso oruma oarihoni Yesusi.

⁵¹Ia honue isa pani rei, irehe nipae mani, ipusu Yesusi. Oyo sio nanie osotai, ⁵²ne inosu ne nipae rei, oyo irumai sanakui.

Yesusi Iamanane Ia Imam Onate

⁵³Sio orori Yesusi pani ia imam onate. Hoka pani oyo, sio imam onata, sio onata, runa sio matuhete Musa ne maunauna pusiso oamanouso. ⁵⁴Petu ipusu Yesusi on ria hainau rotutu inusui pani mitanunue rerihoni ia imam onate ne numa nene pakelo. Hoka pani oyo, iru-ruei iasa tinaini haineke usa runa sio mamsakaya. ⁵⁵Sio imam onata runa sio pusiso on sinasi rei onina sio umau na osima rerihoni Yesusi ne masanau na sio oruiki osi sio wasoni no kawasa ohunui. ⁵⁶Sio panesi ohoka oruni oakarota rerihoni Yesusi, ne sio no mamrunia osa tewa. Sio pusiso oruni tamena. Reiso sio no kawasa oaisosiso ohunui tewa.

⁵⁷Oyo sio umau ohitio roe, oyo oruni oakarota rerihoni Yesusi oahata, ⁵⁸Ami aatinui iasau ata, 'Mka au ukohu Anahatana ne numa

reini, sio ruao onanai, oyo onona ua, oyo unana honue. Areimo sio ruao onanai tewa." ⁵⁹Aikee sio no mamrunie osa tewa.

⁶⁰Reiso ia imam onate iooi kua tihue, oyo iasei tau Yesusi, "Sio rei oruni kahatene rerihonia. Ne ano aasau saisa tewa?" ⁶¹Ne Yesusi iamaturui mani. Iasau saisa tewa. Oyo ia imam onate iasei honu, "Ano waini la Anahatana Iratia lunaso Okarihuru, ia ita iainaa runai anai?" ⁶²Yesusi iasau ata, "Au wani ia rei. Mka omi pusimo onoo au, Tumata Reini Mo, Anahatana Ihitiku, urue mai la Ne Kawasa hanai wanane. Mka uhokaku honu runa yahu on roe nante."

⁶³Reiso ia imam onate ikiha ne papite na sio oanei ata iakapuku tau Yesusi. Oyo iasau, "Kahurae sio oruni oamanarui tewa nea. ⁶⁴Omi ruamo oatinui ianamana sani ia Anahatana. Omi oapamata sou sapani?" Sio pusiso oapamata sou ata Yesusi isana reiso kahurae sio ohunui. ⁶⁵Oyo sio umau ohuto Yesusi, onete matai usena na inoo tewa, oyo ohitai oaumaniki oasau osiki, "Masi aasau. Ia sia ihitaya?" Sio mamsakaya oi oroho Yesusi panesi.

Petu Ipenei Isima Ata Iationa Yesusi

⁶⁶Petu wai pani naniai rei asi, oyo ia pina makahaie tau ia imam onate ihokai mai. ⁶⁷Inoo ata Petu waini iasa tinaini haineke usa, oyo ino-noo uai anoe ia-ia, samatoro iasei, "Ano oi akata ia Nasareti, waini nanai Yesusi tea?" ⁶⁸Ne Petu on poe iasau ata, "Au uationai tewa. Au uanei tewa ano aasau sapani!" Oyo Petu ieui pani mitanunue.

⁶⁹Ia pina makahaie inoo Petu, oyo iasau osi sio pani rei, "Manisate, ia reini, ia isa rerihoni sio." ⁷⁰Ne Petu iasau honu ata, "Au? Au uationai tewa."

Potuina tewa, oyo sio pani rei oasau osi Petu, "Nene manisate, ano isa arihoni sio rei. Tau sae? Ano rerihoni Kalileal!" ⁷¹Oyo Petu isopa ruai iahata, "Anahatana nanai. Au uationa ia rei, omi wani oanamana tanui, tewa."

⁷²Mata hun tewa oyo, manue eretunkeko honu. Eretunkeko nai ua nea. Oyo Petu anoi erepeka ata Yesusi iasau osiki. "Manue eretunkeko

nai ua tewasi, ano aasau ata aationa au tewa nai tonu nea." Reiso Petu irani anoi mananokone.

Yesusi Iamanane Pilatusi

15 Tau omnano tunne, sio pusiso, sio imam onata, sio onata, runa sio matuhete Musa ne maunauna oruraso. Sio okanihoo Yesusi, oyo ororiki nanie oruiki osi Pilatusi, ia mainae tau tihue rei. ²Ororiki oyo, Pilatusi iasei tanui, "Areimo manisate? Ano wani natu tau sio Yahuriu?" Yesusi iasau, "E-e. Areimo sani ano aasau rei." ³Sio imam onata oamanaru Yesusi ata ne masanau panesi. ⁴Reiso Pilatusi iasei honu tau Yesusi. "Ano aasau saisa tewa? Masi anoo, sio osima sapani rerihoni ano." ⁵Ne Yesusi iasau saisa tewa, reiso Pilatusi isira.

⁶Tau karisaa sio anoo rapeka runa noa upu oarihoni Mesire, Pilatusi ihoka-hoka ia isa rerihoni pui waini sio oainisiki. ⁷Pani pui tau sio ohunu tumatau tau sio oatana runa sio kupaniau waini ia isa nanai Parapasi. ⁸Reiso sio hutue ohokaso, oyo oainisi tau Pilatusi ata ihoka ia isa sani sui osa tau karisaa rei. ⁹Reiso Pilatusi iasei, "Omi nanie au uhoka natu tau omi Yahuriu osimo?" ¹⁰Iasei sani rei tau inoo ata sio imam onata orui Yesusi osiki tau sio wasoni oanana.

¹¹Ne sio imam onata oasau osi sio hutue, "Oainisi ihoka Parapasi. Pene oainisi ihoka Yesusi." Reiso sio oainisi Parapasi. ¹²Oyo Pilatusi iasei honu tau sio hutue rei, "Reiso omi nanie ata au uuna sae runa ia reini waini omi oaoiki tau natu tau omi Yahuriu?" ¹³Sio oakapona, "Rerei roe ai wani renienel!" ¹⁴Reiso Pilatusi iasei, "Tau sae? Ia ne rosa sae?" Oyo sio oakapona erenesi sinasi, "Rerei roe ai wani reniene!"

¹⁵Tau Pilatusi nanie sio anoo iaka, ihoka Parapasi osiso. Oyo iaisosi sio umau osapu Yesusi tau awane unia. Osapui samatoro iruiki osi sio na orerei roe ai wani reniene.




Sio Soratatua Oaumania Yesusi

Sio Orere Yesusi Roe Ai Wani Reniene

¹⁶Sio soratatua orori Yesusi pani ia onate rerihoni kupania ne numa, oyo sio oanaha runa sio no tikane soratatua pusiso. Oanaha runaso, oyo oamanouso. ¹⁷Sio nanie oaumania Yesusi tau sio oaoiki tau natu. Reiso sio oausahu papi msinae osiki, oyo opepe awane unie wani nonae. samatoro oausahui roe unui ¹⁸Oyo sio orui tapea osiki


oasau ata, "Arue nai-naimu, natu tau sio Yahuriu." ¹⁹Erehanake sio ohita-hita unui tau ai sanae, oyo ohuto-hutoi, samatoro orike tune mai Yesusi sani sio orui muirani osiki. ²⁰Sio oaumaniki pusi, oyo onosu papi msinae rei, oyo oausahu ruai ne papite osiki honu. Oyo ororiki pani manahane, nanie orerei roe ai wani reniene.



Simoni Ihana Ai Osi Yesusi

²¹Sio otentene tau Simoni, ia Kirene, na ihana ai osi Yesusi. Ia rei Alesanre runa Ruhusi amai. Ia mato ihokai rerihoni niane, nanie inusui roe kota. ²²Reiso sio orori Yesusi roe pupue wani nanae Kokota, nene manariti, unuke kaniē. ²³Hoka roe oyo, sio nanie orui anggur wani onehui runa mur, na pene iahana tinaini ereina. Ne Yesusi ipenei ininui. ²⁴Oyo sio orerei roe ai wani reniene, samatoro sio oaiseeso tau hatu kania, nanie osama Yesusi ne apia osi sio ruao. ²⁵Sio orerei roe ai tau ranie erehiti-hiti. ²⁶Sio oaunutu roe ai wani reniene rei, roe unui ia ne masana sae. Sio okanu, "Natu tau sio Yahuriu." ²⁷Runa Yesusi, sio orere sio kimanakana ua roe ai waroni ranienne. Ia isa mai Yesusi hanai

wanane runa ia isa mai hanai pante. ²⁸Sio ouna sani Anahatana ne anamanaya raasau, "Sio oahata ia rei, ia isa rerihoni sio kahatena."



Sio Orere Sio Kimanakana Ua Roe Ai Waroni Raniene Runa Yesusi

²⁹Sio wasoni onikuso, okoka unuo oaumaniki, oyo orati osohi Yesusi, oasau ata, "He. Ano aasau ata mka akohu Anahatana ne numa, oyo onona ua, oyo anana honue. ³⁰Masi asipua rerihoni ai wani reniene reino runa auna akarihuru ruamu."

³¹Sio imam onata oi runa sio matuhete Musa ne maunauna oaumaniki, oasau, "luna sio panesi okarihuru ne ianei iuna ikarihuru ruai tewa. ³²Kani ia rei waini natu Israeli, ia Anahatana Iratiki lunaso Okarihuru, kahurae isipui rerihoni ai wani reniene rei na ita inoo runa iparisaai." Sio ua rei, sio orereso roe ai waroni raniene orati osohi Yesusi oi.

Yesusi Imatai

³³Tau ranie katopu, oyo ranie hatae rei erepumono i pani tihue rei rotutu ranie ereuni. ³⁴Oyo Yesusi iakapona nioni mainae tau ia ne sou, "Eloi, Eloi lama sapatani?" Nene manariti, "Upuku. Anahatana. Ano aeu aarihoniku, nanie ta hae?"

³⁵Sio umau pani rei oatinu ioi sani rei, reiso oasau, "Masi oatinu. Ioi Elia." Elia rei, ia waini ia mamruni Anahatana ne anamanaya masuae. ³⁶Ia isa pani rei irumai inana nokasa sanae. Inonoi poe sanau maninue, samatoro isumai tau ai sanae rurue. Oyo isopai roe Yesusi sihurui, nanie Yesusi ininu sanautere rei, oyo iahata, "Napa ee. Mai, ita inoo ata kani Elia ihokai iaputunui rerihoni ai wani reniene rei te tewa."

³⁷Oyo Yesusi iakapona mainae, samatoro nahai erenikui.


³⁸Nipae wani erenete mitanunue roe Anahatana ne numa wakihai eresamai tau ua on roe rurue rotutu poe rurue. ³⁹Ia kapitane tau sio soratatua utuni ioi mai ai wani reniene uae iatinu Yesusi iakapona runa inoo Yesusi imatai sapani, iasau ata, "Nene manisate, ia reini Anahatana anai."

⁴⁰Pani rei oi wasoni sio pinau mkana oasumata pusire on hainau. Tau sio rei wasoni Salome, Maria (rerihoni niane Makalena), runa Maria (Yakopusi ia honue runa Yosesi inai). ⁴¹Sio rei opusu Yesusi runa oakahaiki kani waipo Kalilea. Pani rei wasoni sio pinau panesi oi. Sio rei ohokaso mai Yeruselemi okata Yesusi.

Sio Oaunutu Yesusi

⁴²Ranie hatae rei, areimo ranie hatae sio oatanunu tau hanroe. Tau sae? Hanroe, areimo ranie hatae rei iaranahata. Tau ranie manne nea. ⁴³Yusu rerihoni niane Arimatea ihokai. Ia rei, ia isa rerihoni sio ona Yahuriu. Sio panesi oationai runa orui-muirani osiki. Ia oi waini inapa ranie hatae rei sio pusiso mai tuniai reini opusu Anahatana ne maue tau sio oanei ata ia Natu. Reiso Yusu iapamese anoi, oyo ihokai mai Pilatusi nanie iainisi matane waini nanai Yesusi. ⁴⁴Pilatusi isira iatinu ata Yesusi waini imatai nea. Reiso iaisosi ia isa ioi ia kapitane tau soratatua utuni rei, oyo iasei tanui, "Yesusi imatai nea?" ⁴⁵Ia kapitane rei isima ata

Yesusi imatai nea, oyo Pilatusi iamanaku. Iasau tau Yusu, "Anana matane rei." ⁴⁶Oyo Yusu ihane nipae iake isa, samatoro iaputunu Yesusi, oyo iopai tau nipae rei. Oyo inusu matane rei pani hatu nohue. Hatu nohue rei, sio ounai rerihoni hatu tatepie. Inusu matane rei, samatoro ikamauni hatu mainae erenete hatu nohue nene mitanunue. ⁴⁷Maria, ia Makalena, runa Maria, Yesusi inai, oasumata sio oaunutui.



Ikamauni Hatu Mainae Erenete Hatu Nohue Nene Mitanunue

Yesusi Iamahalki Honu

16 Ranie hatae rei iaranahata erenikui nea, oyo Salome, Maria (rerihoni niane Makalena), runa Maria (Yakopusi inai) tonuso oeu ohane hau rihue nanie osonai roe Yesusi tinaini. ²Tau omnano tunne, ranie hatae mata anoe rerihoni onona itu rai, sio oeuso poe hatu

nohue tau ranie eresaa nea. ³Sio oasei tau umau, "Ia sia pisa iakahaita ikamauni hatu wani erenete hatu nohue nene mitanunue?" ⁴Hoka poe oyo, sio onoo roe uae, samatoro sio onoo ata sio okamauni hatu rei rerihoni mitanunue nea. Hatu rei mainae nai osa. ⁵Reiso sio onususo pani hatu nohue rei, samatoro onoo ia honue isa iru-ruei mai hanao wanana iausahu papi putia. Onoo ia honue reiso osira hun ruao. ⁶Ia honue rei iasau osiso, "Pene osira. Omi onina Yesusi rerihoni niane Nasareti. Ia rei, sio orerei roe ai wani reniene. Waini tewa. Waini iamahaiki nea. Masi onoo, naniai wani sio oaunutui wapo rei. ⁷Masi oeu oruni-runi osi Petu runa sio mampusua pusiso. Osima osiso ata, 'Yesusi waini ieu ianaonemo poe Kalilea. Poe rei omi onooi sani naone iasau osimo.'"

⁸Reiso sio ohokaso rerihoni hatu nohue rei, oyo orumaso. Tau sae? Sio osira runa okaitau. Sio oasau saisa tewa osi ia sia mani tau sio okaitau hun ruao.



Naniai Wani Sio Oaunutui Yesusi Pani Hatu Nohue

Yesusi iatuhete Ruai Osi Ne Mampusua

⁹Yesusi iamahaiki honu tau omnano tunne tau ranie hatae mata anoe rerihoni onona itu rai. Mata anoe, iatuhete ruai osi Maria, ia pina Makalena. Naone, Yesusiinei sakahatena itu rerihoni ia pina rei. ¹⁰Reiso Maria, ia pina Makalena, ieu isima ata inoo Yesusi waini iamahaiki. Isima osi sio wasoni naone okata Yesusi. Sio rei wasoni orani oasanoata. ¹¹Ne oatinu ata Yesusi waini iamahaiki runa Maria inooi nea, sio oparisaa tewa.

¹²Oyo Yesusi iatuhete ruai osi ne mampusua ua. Uaso onooi tamene. Sio onooi pannuhu sio wasoni oeuso mai nisiu. ¹³Reiso onuniso, oyo oruni ata sio onoo Yesusi. Sio oruni osi sio tamena. Ne sio tamena reimo oparisaa tewa.

¹⁴Tau muie Yesusi iatuhete ruai osi ne mampusua hutusa rahana osa tau sio wasoni oaiso. Ia iasau nioi mainae. Tau sae? Sio opisa unuo tewa runa sio unuo onata reiso sio oparisaa tewa sio rei wasoni oruni-runi. Sio oruni ata sio onoo nea ata Yesusi waini iamahaiki honu. ¹⁵Oyo Yesusi iasau osiso, "Oeu ohori niana-niana pusire mai tuniai reini. Oaunau tau Maunau lake rerihoni Anahatana. Oaunau sio pusiso mai tuniai reini. ¹⁶Ia sia waini iparisaa, oyo sio osohui, ia rei ikarihuru runa iruei haineke Anahatana rotutu ria supani. Ne ia sia iparisaa tewa, mka Anahatana iaisosiki ieu hainau rerihoniki. ¹⁷Sio oparisaa, mka ouna sima-simana sani onei sakahatena tau nanaku, oanamana tau sou waroni sio oaneire tewa. ¹⁸Munata sio orime tekene te oninu minne, sio rei okupu tewa, omata tewa. Munata sio oahusie sio kupua tau hanao, oyo sio kupua rei iaka. Okupu tewa nea."

¹⁹Upuri Yesusi ianamana runaso pusi, oyo Anahatana iapusaai roe noiyaha. Roe rei, Yesusi iruei mai Anahatana hanai wanane. ²⁰Reiso sio mampusua oeu oaunau Anahatana ne maunauna sui niana-niana mai tuniai reini pusire. Upuri oi iakahaiso na ouna sima-simana. Tau rei, sio pusiso oanei ata sio no anamanaya manisata.

KAMUSI

A

ainaa - anamana iake rerihoni ia isa. Sani ia isa iainaa runa Anahatana, iasau sani rei, "Anahatana! Ano iake tunne nai osa. Ano auna pusire iake. Ano me kawasa mainae. Me kawasa auna sae mani. Ano manisate. Reiso ami aainaa runa ano tau ano me iake rei."

Mrk 2:12, 5:33, 11:9-10

ai wani reniene - ai isa ereoo poe tuamane runa ai inate isa roe naue, ai inate rei waro reniene, nooi sani huruf t. (Noo siaie tau Mrk 15:24). Sio Romau ohunu sio kahatena, sio orereso roe ai wani reniene. Ia natu Roma ne kawasa tau tihue Israeli pannuhu Yesusi iamahaiki mai tuniai reini. Reiso sio ruao no kawasa ohunu sio kahatena.

Mrk 8:34, 15:24

akakinae sani sio no kawasa rerihoni Anahatana - sima-simane. Munata ia isa iuna akakinae sani rei, sio pusiso oanei ata ne kawasa rerihoni Anahatana, oyo oatinu tau ne maunauna.

Mrk 8:11

akanupu osi Anahatana - Anahatana iaisosi sio Israeliu oakanupu makapanau sani rompau, koropou, une-uneu, runa manua osiki. Sio oakanupure samatoro Anahatana iuna heu no rosau. Sio oakanupure roe hatu waroni sio otanuhahare roe Anahatana ne numa. Mata anoe sio opesi makapana rei nene nasi tau hatu rai, samatoro oakanupu nene tinaie roe hatu hahae.

Mrk 1:44, 12:33